



ル 5
3252
7



門 几 5
號 3252
卷 7

3252

昭和十七年
五月三十日
購求

廣東考古輯要卷三十五

名宦一

秦

任囂秦南海尉能和輯粵眾粵人皆附天下大亂而南海不被
 兵甲囂之力也病且死召龍川令趙佗語曰聞陳勝等作亂
 秦為無道豪傑畔之南海東西數千里頗有中國人相輔可
 以立國郡中長吏無足與言者故召公告之即被佗書行南
 海尉事

趙佗真定人秦并天下至二世時南海尉任囂病且死召佗被
 書行南海尉事囂死聚兵自守因稍以法誅秦所置吏秦滅
 自立為南粵武王

兩漢

羅宏長沙人元封五年爲交州刺史春行冬息徧歷所部咨詢疾苦一時會殘爲之歛迹所至繕葺城社番禺都內尉佗有南武城其北越王山路井陌連磴相傳爲宏所開

僮尹丹陽人舉孝廉爲郎需次京師顯宗奇其才引見便殿應對合旨因拜僭耳太守未幾擢交州刺史還至珠崖勅官吏毋貪珍賂諭其民毋鏹面頰以自別於洞俚雕題之屬自是日變建中初以尹能匡俗信民遷武陵太守

揚扶字聖儀會稽烏傷人爲交趾刺史有理能名洞民有羣人家奪飲食者捕縛就扶扶謂曰汝第飢爾叱使就粟南海郎吏以爲縱惡不可扶笑遣之行二日盡投江中聞者大驚綦母俊會稽上虞人少涉儒學治左氏春秋永初中舉孝廉拜左校令出爲交趾刺史元初中討合浦蠻所向摧靡功當封

賞上書自讓安帝下詔美之賜高山冠絳三四後同郡虞翻稱俊拔濟一郡讓爵土之封謂此也

張喬南陽人永和二年日南象林徼外蠻夷區憐等數千人攻象林縣燒城寺殺長吏刺史樊演與侍御史賈昌等討之不利帝以爲憂明年召公卿百官問方略大將軍李固謂喬前在益州有破虜功可任用卽拜爲交趾刺史喬至開示慰誘並皆降散嶺外復平

周敞汝南人舉孝廉永和中爲交趾刺史懷柔民夷甚有成惠自鄧讓以七郡歸附後寇賊時發敞能勞來安集海寇不敢犯境常行部至龍川聞山木響異因伐取其中以爲鼓以下分鼓給桂林郡上分鼓給交趾郡擊一鼓則二鼓皆鳴俚獠相驚謂有龍潛而密應莫不畏之因名其山曰龍山又辟同

郡陳茂爲別駕從事並有奇績茂字君因汝南人容止嚴恪
舊刺史行部不渡漲海敞涉海遇風船欲覆茂拔劍訶水神
風立止

夏方九江人爲交州刺史建康元年日南夷千餘人攻燒縣邑
煽動九真九真太守兒式戰死賊眾轉強盛方威惠素著開
恩招誘宿賊相率詣方降者二萬餘人

張磐字子石丹陽人以操行清廉見稱守廬江時京師諺曰聞
清白張子石延熹中長沙賊起寇桂陽蒼梧荆州刺史度尚
破之徵還京師桂陽賊胡蘭等復攻桂陽餘黨南走蒼梧時
磐爲交州刺史擊敗之賊復入荆州界復出尚爲荆州刺史
尚懼爲己負乃僞上言蒼梧賊入荆州於是徵磐下廷尉會
赦見原磐不肯出獄吏謂曰天恩曠然而君不出何也磐因

自列廷尉以其狀上詔徵尚到廷尉辭窮受罪以先有功得
原

蔣晉荆州泉陵人靈帝時舉孝廉拜尚書郎累遷至交趾刺史
入奏事應對不滯拜尚書

朱雋字公偉會稽上虞人光和元年以交趾賊梁龍等與南海
太守孔芝叛拜雋爲交趾刺史擊之遂斬梁龍降者數萬旬
月盡定以功封都亭侯徵爲諫議大夫

賈琮字孟堅東郡聊城人舉孝廉再遷爲京兆令有政理迹舊
交趾多產明珠翠羽瑋瑁異香之屬前後刺史多無清行上
承權貴下積私賂故吏民怨叛中平元年交趾屯兵反靈帝
勅三府精選能吏有司舉琮爲交州刺史琮到部訊其反狀
咸言賦斂過重民不聊生故聚爲盜琮卽移書告示各使安

其資業斬渠師之爲大害者歲間蕩定百姓以安巷路爲之歌曰賈父來晚使我先反今見清平吏不敢飯在事三年爲十三州最徵拜議郎

孫輔字國儀賁弟也以揚武校尉佐孫策平三郡策立爲廬陵太守遷平安將軍假節領交州刺史遣使與曹公相聞事覺權幽繫之卒

周乘字子居汝南安城人天資聰朗亭峙岳立非陳蕃黃憲之徒不交也建安中拜待御史公車司馬令不畏強禦以是見怨於幸臣出爲交州刺史上書畧云南交絕域習於貪濁侵漁萬民貽毒久矣今爲聖朝掃清一方屬縣解印綬棄官者四十餘城

步騭字子山臨淮淮陰人建安中出領鄱陽太守明年拜征南

中郎將蒼梧太守吳巨陰懷異心騭誘與相見因斬徇之威聲大震士燮兄弟相率供命南土之賓自此始也益州大姓雍閻殺蜀所署太守正昂求欲內附騭因承制宣撫由是加拜平戎將軍封廣信侯

呂岱字定公廣陵海陵人延康中代步騭爲交州刺史到州高涼賊錢博乞降又討鬱林夷破之岱旣定交州復進攻九真斬獲萬數權嘉其功進拜鎮南將軍以南土清定召還屯長沙漚口會武陵夷蠢動與太常潘濬共討定之岱清身奉公所在可述初在交州歷年不餉家妻子飢乏權聞之加賜錢兵布絹歲有常限

費貽健爲人光武聞其賢徵爲合浦太守涖政清簡民懷其德合浦江山皆以廉名由貽廉故也

衛颯字子產河內修武人家貧好學隨師無糧常傭以自給王莽時仕郡歷州宰建武中遷桂陽太守郡與交州接境頗染其俗不知禮則颯下車修庠序之教設婚姻之禮期年邦俗從化先是浚滙潁陽三縣越之故地武帝平之內屬桂陽民居深山不出田租去郡遠者或且千里吏事往來輒發乘舩名曰傳役每一吏出徭及數家百姓苦之颯乃鑿山通道列亭傳置郵驛於是役省勞息流民稍還漸成聚邑使輸租賦同之平民颯理郵民事居官如家視事十年郡內清理

茨充字子河

水經注作子何宛人也

舉孝廉為桂陽太守俗不種桑無蠶織絲麻之利盛冬民皆以火燎足多剖裂充令屬縣教民種桑柘養蠶織履民悉化之卒後廟食連州

鄧彪字智伯南陽新野人少勵志修孝行五遷桂陽太守後徵

為太尉在位清白旬宣所至聽訟必久坐詳諭曲直之南所憇有鄧公石民於石上建祠報之

許荆字少張會稽陽羨人少為郡吏和帝時稍遷桂陽太守風俗脆薄不識學義荆為設制度使知禮樂常行春到來陽縣人有蔣均者兄弟爭財互相言訟荆對之歎曰吾荷國重任而教化不行罪在太守乃上書陳狀乞詣廷尉均兄弟感悔各求受罪在事十二年父老稱歌卒於官桂陽人為立廟樹碑

樂巴字叔元魏郡內黃人好道順帝世以宦者給事掖庭補黃門令非其好也性質直學覽經典雖在中官不與諸常侍交接四遷桂陽太守以郡處南乘不閑典訓立學校以獎進之視事七年以病乞骸骨

李溫巴郡宕渠人少與同里馮緄學春秋司馬兵法順帝時為
桂陽太守善折獄吏民畏之後緄持節揚州討賊溫帥兵相
犄角破之謝病歸卒於家葬與緄聯冢今所謂馮李是也

度尚字博平山陽湖陸人延熹中長沙零陵賊亂入桂陽蒼梧
南海交阯尚書朱穆舉尚自右校令擢為荊州刺史尚躬率
部屬與同勞逸進擊破之悉平諸賊詔賜尚錢百萬

周憬字君光徐州下邳人體性敦仁天資篤厚舉孝廉拜尚書
侍郎遷汝南固始相遂拜桂陽時邦域惟寧郡又與南海接
比商旅所臻自瀑亭至於曲紅一由此水其源出於王禽之
山分流離散多所壅遏憬乃貫山鑽石浮沈潛伏于渠萬澮
合聚谿澗民賴之

孟嘗字伯周會稽上虞人少修操行為合浦太守郡不產穀實

而海出珠寶與交阯比境常通商販先時宰守貪穢珠遂漸徙
交阯郡界於是行旅不至人物無資死餓相望嘗到官革易
前敝未踰歲去珠復還百姓皆反其業稱為神明以病自上
被徵當還吏民攀車請之嘗不得進乃載鄉民船夜遁去隱
處窮澤身自耕傭鄰民慕其德就居止者百餘家桓帝時尚
書同郡楊喬上書薦之竟不見用年七十卒於家

李肅字偉恭南陽人少以才聞善議論臧否得中眾人以此服
之為桂陽太守吏民畏悅卒知與不知並痛惜焉

孔嵩字仲山南陽人少與山陽范式為友後式官荊州刺史而
嵩家貧親老乃變名姓傭為新野縣阿里街卒式行部至新
野而縣選嵩為導騎迎式式見而呼之謂曰昔與子俱曳長
裾遊進帝學吾蒙國恩致位牧伯而子懷道隱身處於卒伍

不亦惜乎遂辟公府之京師道宿下亭盜竊其馬尋問知其
嵩也乃送謝之後官至南海太守在郡清白麤袍糲食如貧
賤時

陳稚升蒼梧太守治尚清靜囹圄恆空臨水釣魚以自適

黃演字元長荊州江陵人性至孝章和中舉孝廉仕番禺令涖
政廉平吏民安之

三國吳

陸允字敬宗凱弟也赤烏中交阯九真夷賊攻沒城邑以允爲
交州刺史允入南界喻以恩信賊黨悉降中書丞華覈表薦
之其畧曰允天姿聰明才通行絜在州十有餘年內無粉黛
附珠之妾家無文甲犀象之珍方之今臣實難多得宜在輦
轂股肱王室以贊唐虞

吳展字士季下邳人篤學慎行爲鄉里所重州舉孝廉仕至廣
州刺史南嶠秀才蔡洪稱其忠足矯非清足厲俗信可結神
才堪幹世被徵而去後爲吳郡太守吳平還下邳閉門不出
虞授會稽餘姚人少嗜經史壯負智畧仕至廣州刺史軫恤災
旱闔境大治三年代去後南土盜發復用爲廣州督居常以
馬革裹尸自許郭馬作亂竟死難人以爲讖

滕修字顯先南陽西鄂人仕吳爲將帥王師伐吳修率眾赴難
至巴邱而皓已降乃縞素流涕與廣州刺史閻豐蒼梧太守
王毅各送印綬以修爲安南將軍封武當侯加鼓吹

陶璜字士英丹陽秣陵人仕吳歷顯位有謀策周窮好施能得
人心皓旣降晉勅璜歸順璜流涕數日遣使送印綬詣洛陽
帝詔復其本職封宛陵侯在南三十年恩威著於殊俗及卒

舉州號哭如喪慈親

鍾離牧字子幹會稽山陰人赤烏中為南海太守威恩部伍智勇分明操行清純有古人之風在郡四年以疾去職

羊衝南陽人受知孫權為賓客時廷尉監隱蕃交結豪傑自衛將軍全琮等皆傾心敬待惟衝及豫章楊迪拒絕不與通蕃後叛逆眾乃服之赤烏二年廖式作亂既平以為桂陽太守甘露元年分桂陽郡為始興郡改為始興太守益研政術南嶠率服藻鑑人物卒無一爽人皆敬之

晉

諸葛京字行宗瑯邪陽都人亮之孫瞻之子也位至廣州刺史推誠待物有祖風烈吏民稱之

王毅長沙人少以學行被州郡辟仕至蒼梧太守

王諒字幼成丹陽人少有幹畧為王敦所擢稍遷武昌太守初新昌太守梁碩專威自用諒陰謀誅碩使客刺之弗克遂率眾圍諒於龍編諒敗碩逼奪其節諒不與遂斷其右臂諒正色曰死且不畏斷臂何有悲憤十餘日而卒

葛洪字稚川丹陽句容人少好學家貧親自伐薪以買紙筆夜輒寫書誦習遂以儒學知名太安中石冰作亂吳興太守顧秘為義軍都督檄洪為將兵都尉攻冰破之遷伏波將軍冰平洪不論功賞還鄉禮辟皆不赴以年老欲煉丹祈遐壽聞交趾出丹求為勾漏令帝從之至廣州刺史鄧嶽留不聽去乃煉丹於羅浮山

陶侃字士行本鄱陽人吳平徙家廬江之尋陽以軍功封東鄉侯王敦深忌侃功將還江陵詣敦別敦留侃不遣因欲殺之

爲詔議參軍梅陶長史陳頌所止於是設盛饌以饒侃侃便夜發進至始興適王機温邵叛侃遣部將討機斬之諸將皆請乘勝擊邵侃曰吾威名已著何事遣兵但一函紙足耳乃下書諭之邵懼走以功封柴桑侯在州無事輒朝運百甓於齋外暮運於齋內人問其故答曰吾方致力中原過爾優逸恐不堪事其勵志勤力皆此類也太興初平蘇峻之亂進侍中太尉加羽葆鼓吹改封長沙郡公加都督交廣甯七州軍事咸和七年疾篤上表遜位薨於樊谿年七十六

謝奉字宏道會稽山陰人爲廣州刺史清靜不煩後免官謝安遇於破岡共語三日安欲慰其失官奉輒引以他端信宿中途竟不言及此事安謂同舟曰謝奉故是奇士

羅友字他仁襄陽人好學嗜酒桓温常責之傲然不屑家貧乞

祿温雖以才學遇之而謂其誕肆非治民才也同府人有得郡者温爲席送別友至尤晚問之答曰中途逢一鬼大見挪揄云我只見汝送人作郡何以不見人送汝作郡是以淹緩温雖笑其滑稽而心頗愧焉後遷廣益二州刺史舉其宏綱不存小察吏民安焉

孔汪字德澤會稽山陰人好學有孝行武帝時位至侍中後出爲廣州刺史甚有政績嶺表稱之

吳隱之字處默濮陽鄆城人魏侍中質六世孫美姿容善談論博涉文史弱冠有清操雖日晏歡菽不饗非其粟擔石無儲不取非其道廣州包山帶海珍異所出前後刺史皆多贖貨朝廷欲革其弊以隱之爲龍驤將軍廣州刺史未至州二十里地名石門有水曰貪泉飲者懷無厭之欲隱之既至語其

親人曰不見可欲使心不動越嶺喪清吾知之矣乃至泉所酌而飲之因賦詩曰古人云此水一飲懷千金試使夷齊飲終當不易心在州清操逾厲食常不過菜及乾魚而已後盧循寇南海爲所得久方得反歸舟裝無餘貲妻劉氏齎沈香一斤隱之投於湖亭之水卒贈光祿大夫加散騎常侍

儲叔度河南陽翟人爲高祖車騎參軍事盧循攻查浦叔度力戰有功高祖甚嘉之封番禺縣男

張茂度吳郡吳人張良後也盧循爲寇與建安太守孫蚪之並受其符書循走坐免官復以爲始興相郡經賊寇廨宇焚燒百不存一茂度立城寺弔死撫傷民戶漸復嶺外安之

杜瑗交阯朱敷人以功爲龍驤將軍交州刺史盧循竊據廣州遣使通好瑗斬之瑗卒以第五子慧度行州府事因率文武

數千人與循合戰放火箭雉尾炬循艦一時俱然循中箭赴水死旣平封慧度龍編縣侯

劉謙之彭城呂人好學義興末爲始興相東海人徐道期流寓廣州無士行率羣不逞之徒作亂謙之破走之

王鎮之字伯重琅琊臨沂人居官有能名遷御史中丞秉正不撓百寮憚之出爲使持節都督交廣二州諸軍事不受俸祿蕭然無所營去官之日不異始至高祖謂人曰王鎮之少著清績必將繼美吳隱之嶺南之弊非此莫康也

王誕字茂世琅邪臨沂人少有才結事元顯嬖人張法順故爲元顯所寵元顯欲悉誅桓氏誕固陳脩與元志趣不同由此得免及元得志誕將見誅脩固誕甥爲之陳請乃徙廣州後爲盧循所拘久之乃還

尹虞長沙人任始興太守起兵討杜弼戰敗二女為所獲有國色弼欲妻之不屈並見害

楊方字公回少好學有才初為郡鈐下威儀公事之暇輒讀五經內史諸葛恢見而奇之待以門人之禮儒學虞喜兄弟及主簿虞預並稱美之為之延譽由是得周旋貴人王導辟為參軍自以京師地寒不願久留補高梁太守在郡積年多所撰述皆行於世

鄧騫字長真長沙人有節操識量宏遠善與人交太尉庾亮稱為長者累官至大司農

袁宏字彥伯有逸才文章絕美謝尚鎮牛渚引參軍事累遷大司馬桓温府記室性强正雖被温禮遇至於辯論每不阿屈故榮任不至

宋

陸徽字休猷吳郡人元嘉中為始興太守明年除廣州刺史清名亞王鎮之為士民所愛

劉劭字伯猷彭城人少有志節兼好文義家貧為廣州增城令廣州刺史劉道錫引為揚烈府主簿奉使詣京都太祖引見之酬對稱旨除甯遠將軍綏遠太守會豫州刺史殷琰反徵勸率眾討之琰降約令三軍不得妄動百姓感悅咸曰來蘇生為立碑

宗慤字元幹南陽人年少時叔炳問其志慤曰願乘長風破萬里浪炳曰汝不富貴破我家矣元嘉中伐林邑除震武將軍林邑王范陽邁傾國來拒以具裝被象士卒不能當慤曰吾聞師子威服百獸乃製其形與象相禦象驚眾因潰散遂克

林邑文帝嘉之以為廣州刺史

王琨瑯琊人為平越中郎將廣州刺史南土沃實在任者常致巨富世云廣州刺史但經城門一過便得三千萬也琨無所取表獻祿俸之半州鎮舊有鼓吹又啓輸還及罷任孝武知其清問還資多少琨曰臣買宅百三十餘萬餘物稱之帝悅其對

陳伯紹潁川人泰始中妖賊攻廣州伯紹時為龍驤將軍討平之常獵北地見二青牛驚走入草使人逐之不得乃誌其處曰此地當有奇祥

孫曇瓘吳郡人少讀書知大義明兵法果幹有氣力為屯騎校尉驍勇善戰每運矛超距軍士率服後為蕭道成所殺謝昌寓陳都人為劉俊廣州參軍性至孝嘗養一鵠昌寓病二

旬鵠二旬不食昌寓亡鵠遂飛去

徐豁字萬同東莞姑幕人精練明理為世所推為始興太守表陳三事謂郡大田武吏宜減米課郡領銀民宜興農業中宿縣俚民計丁課銀宜計丁課米太祖嘉之

檀和之高平金鄉人有智勇文帝稱為將才元嘉中為始興內史在郡課耕桑靖獄市士民敬之後為龍驤將軍領交廣兵與宗慤克林邑以功封雲杜縣子

鄧琬字元琬豫章南昌人世祖起義版為輔國將軍南海太守臧質反琬弟璩與同逆質敗坐誅以琬在遠有功免死

陸法真吳郡人常為劉秀之安北錄事參軍太山羊希與安北孫詵書曰足下同僚似有陸錄事者為張元外孫持身至清雅有志節年高官下秉操不衰計當日夕相與申意太宗初

為南海太守卒官

孫奉伯始興太守太始中明帝訪太子妃多不合江氏以卜筮吉為納之拜皇太子妃諷朝士州郡皆獻物多者直白金奉伯止獻琴書外無餘物上怒賜死既而原之

伏曼容字公儀平昌安邸人早孤客居南海篤學聚徒教授以自業昇明末為南海太守至石門作貪泉銘

庾道愍潁川陽陵人有孝行能屬友少出孤悴時人莫知其所生母漂流交州道愍尚在襁褓及長知之求為廣州綏甯府佐至南而去交尚遠乃自負擔至交尋求常遇雨寄止一家旦有一姬負薪外還道愍心動訪之乃其母也於是行伏號泣遠近赴之莫不揮淚

南齊

范雲字彥龍南鄉舞陰人為零陵內史潔已省煩苛去游費百姓安之明帝召還都復出為始興內史郡多豪猾二千石有不善者謀共殺害雲入境撫以恩德罷亭候商賈露宿郡中稱為神明

陶季直丹陽秣陵人為冠軍司馬東莞太守在郡號為清和

梁

柳惲字文暢河東解人少有志行好學善尺牘累官吳興太守為政清靜民吏懷之感疾自陳解任父老拜表陳請事未施行天監十六年卒

蕭恭字敬範監南徐州事時衡州刺史武會超在州子姪縱暴州人朱朗聚黨反武帝以恭為刺史時朗已圍始興恭至示以恩義朗遣使請降恭杖節受之一無所問即日收始興太

守張寶生及會超弟之子子仁斬之以其賄而虐也有司奏恭縱罪人專戮二千石詔宥之

蕭勵字文約弱不好弄喜愠不形於色位太子洗馬遷宣城內史郡多猛獸爲人患勵在任獸暴爲息又遷豫章內史道不拾遺男女異路徙廣州刺史出郡之日吏人泣送數百里中舟乘填塞至新淦縣岸山村有老姥以槃擊鱖魚送舟側兒童數十入水扳舟或歌或泣至州織毫不犯前後刺史多營私蓄方物之貢少登天府勵歲中數獻軍國所須相繼不絕武帝歎曰朝廷便是更有廣州卒諡光

蘭欽字休明中昌魏人幼而果決趨捷過人天監中隨父子雲北征授中官直閣大通中破桂陽陽山始興及天漆諸蠻授安南將軍廣州刺史至任前刺史安南侯密遣厨人置藥於

食中毒死年四十詔贈侍中中衛將軍鼓吹一部

歐陽頴字靖世長沙臨湘人爲郡豪族少質直家財累積悉讓諸兄州郡頻辟不應廬於麓山寺傍專精習業博通經史年三十其兄必令從官起家信武府中兵參軍遷平西邵陵王中兵參軍事與左衛將軍蘭欽善隨征夷獠有功累官至征南將軍封山陽郡公元帝稱頴公正有匡濟才交州刺史袁曇緩密以金五百寄頴以還合浦太守並付兒智矩頴後爲蕭勃所破貲財散盡惟所寄金獨在依信還之人服其重然諾弟盛爲交州刺史次弟邃爲衡州刺史合門顯貴名振南土天嘉中薨諡曰穆江總爲作墓誌

杜僧明字宏照廣陵臨澤人形貌眇小而膽氣過人有勇力善騎射梁大同中征涇僚有力累官至清野將軍新州刺史臨

江縣子

徐度字孝節安陸人居京師倜儻不拘小節姿貌瓌偉嗜酒好博侯景之亂高祖克定廣州計畫多出於度兼統兵甲每戰有功封廣德縣侯

王僧孺東海郟人累官至南海太守郡常有外國賈人通貨易其利數倍歷政以為常僧孺歎曰昔人為蜀部長史終身無蜀物吾欲遺子孫者不在越裝並無所取視事期月徵還郡民詣闕請留不許

何遠字義方東海郟人為建康令高祖聞其名擢為宣城太守尋遷始興內史在官好開途巷修葺牆屋居民市里所過若營家焉性果斷民不敢非畏而惜之所至皆生為立祠

王勸字公濟通之弟也美風儀博涉書史為河東王長史行廣

州府事越中饒沃前後守宰例多貪縱勸獨以清白著聞後授廣州刺史未行改衡州刺史會王琳據有上流勸不得之鎮留於大庾嶺

蕭介字茂鏡蘭陵人大同中為武陵王府長史在職清白為朝廷所稱高祖謂何敬容曰蕭介甚貧可處以一郡由是出為始興太守至任宣布威德境內肅清

劉覽字孝智彭城上安里人在官清正無所私姊夫御史中丞褚湮從兄吏部郎孝綽頗通賊貨覽劾奏並免官孝綽怨之謂人曰犬齧行路覽噬家人出為始興內史尤勵清節

周文育字景德義興陽羨人少孤貧本居新安壽昌縣姓項氏名猛奴義興人周蒼為浦口戍主見而奇之養為己子會盧安興為江南督護啓文育同行累征徼獠所在有功除南海

令安興死監州王勸以為長流令嗣被代文育與俱下至大庾嶺詣卜者卜者曰君北下不過作令長南入則為公侯文育曰足錢便可誰望公侯卜者曰君須與當暴得銀至二千石其夕宿逆旅有賈人求與博文育勝之得銀二千兩旦日辭勸勸遣之高祖在高要聞其還也大喜分麾下配焉侯景之亂以為前鋒累立戰功授鎮南將軍都督江廣衡交州諸軍事後為熊曇朗所害諡忠愍

錢道戢字子韜吳興長城人有幹畧高祖微時以從姝妻之累官至左衛將軍

蔡景歷字茂世濟陽考城人少俊爽有孝行家貧好學工草隸善尺牘為海陽令有能名

周鐵虎不知何許人有膂力便馬槊以戰功進爵為侯徐嗣徽引齊寇渡江鐵虎破其水軍於板橋尋隨周文育於南江拒蕭勃又隨文育西征王琳於沌口敗績並為琳所擒琳引見諸將唯鐵虎辭氣不屈故琳盡宥文育之徒獨鐵虎見害

陳

沈君高字季高少知名性剛直有吏能以家門外戚早居清顯累官至平越中郎將廣州刺史嶺南俚獠世相攻伐君高本文吏無武幹推心撫御甚得民和

沈恪字子恭吳興武康人深沈有幹局累官至都督廣衡東衡交越成定等十八州諸軍事鎮南將軍廣州刺史所至綏懷安輯被以恩惠嶺表賴之

馬靖廣州刺史甚得嶺表人心而兵甲精練每年深入俚洞數有戰功朝野頗生異議高宗遣蕭引審其舉措既至靖即悟

旨盡遣子弟下都爲質

王猛字世雄本名勇禎明中授鎮南大將軍都督二十四州諸軍事隋師濟江猛督所部赴援及聞臺城不守乃舉哀素服藉橐不食歎曰申包胥獨何人哉因勒兵緣江拒守後審後主不死乃遣將赴京歸款隋文帝大悅尋卒文帝痛之遣使祭弔封歸仁縣公

陳方慶少清警涉獵書史及長有幹畧至德中爲武州刺史時廣州刺史馬靖久居嶺表大得人心士馬強盛朝廷疑之至是以方慶爲仁威將軍征兵襲靖靖誅進號宣毅將軍禎明三年隋師濟江衡州刺史王勇遣戴智烈將五百騎迎方慶欲令承制總督軍事方慶恐勇賣已率兵拒之戰敗爲智烈所害

隋

韋洸字世穆性剛毅有器幹少便弓馬伐陳之役爲行軍總管陳平畧定九江遂進圖嶺南至廣州嶺表皆降上大悅歲餘番禺夷王仲宣反以兵圍洸洸拒之中流矢卒

裴矩字宏大河東聞喜人奉詔巡撫嶺南未行而高智惠汪文進等相聚作亂及至南康得兵數千人時俚帥王仲宣逼廣州與賊共爲聲援矩與大將軍鹿愿擊破之賊潰散所綏集者二十餘州還報上大悅命升殿勞之顧謂高頴楊素曰韋洸將二萬兵不能早度嶺裴矩以三千敝卒徑至南康有臣若此朕亦何憂

令狐熙字長熙燉煌人性嚴重有雅量隋文帝受禪之際以功拜滄州刺史在職數年風教大洽稱良二千石考績爲天下

最後以嶺南夷數亂徵拜桂州總管十七州軍事至部大宏
恩信溪洞渠帥李佛子入朝佛子欲爲亂人有詣闕訟熙受
佛子賂者上怒命鎖熙詣闕熙性素剛鬱不得志遂卒後上
晤召其四子聽仕少子德棻最知名

樊子蓋字華宗廬江人平陳之役以功封上蔡縣伯煬帝卽位
徵還轉涼州刺史言於帝曰臣一居嶺表十載於茲犬馬之
情戀戀願趨闕廷萬死無恨帝慰遣之

侯莫陳穎字遵道代武川人少有器量爲時所推平陳之役以
功累遷至瀛州刺史時嶺南刺史多貪鄙蠻夷怨叛妙簡清
吏徵穎入朝上與言及平生以爲歡笑卽日拜桂州總管至
官大崇恩信人夷悅服

柳旦字匡德河東解人歷官羅浙魯三州刺史並有能名大業

初拜龍川太守民居山洞好相攻擊旦爲開學校大變其風
帝聞而善之

劉權字世畧彭城豐人爲南海太守行至鄱陽會盜起不得進
詔召募討之權率兵遇賊不戰先乘單船詣賊營說以利害
賊感悅皆降附及至南海甚有異政帝嘉之

鄧文進南陽人其祖徙家廣州素雄於財至文進獨折節讀書
以故士之流徙者競趨其門文進皆設館之賓客至千餘人
因擇其勇畧者使捍鄉井俚洞夷獠聞風慄服大業中爲韶
州刺史及煬帝被弑盜賊滿天下五嶺亦擾文進散財集兵
以赴難歸者數萬掠地至始興時賊帥林士宏據虔饒兵不
得進於是保有廣韶二州從者如市百粵之境得免兵革者
文進之力也無何士宏稱帝遣使授諸帥以僞官文進獨不

受唐高祖武德五年諸帥次第納款文進遂統所部降高祖
勅勞之即拜鷹揚將軍累立戰功為吏民所畏軍中謠曰鄧
守一呼百夫避途言其勇也歿後多著靈響郡人立廟祀於
樂昌

唐

劉齡之彭城人唐初為廣州都督表稱嶺南州縣多用土人任
官不顧憲章惟求潤屋其婚嫁資需即稅人子女百姓怨苦
又首領娶妻不限多少肆情侵奪於是下令禁斷蠻俗便之
李靖本名藥師雍州三原人武德四年陳十策以圖蕭銑高祖
從之授行軍總管兼攝孝恭行軍長史乃帥師而進破其驍
將楊君茂鄭文秀銑請降入城號令嚴肅軍無所私江漢聞
之莫不爭下凡所懷輯九十六州戶六十餘萬優詔勞勩授

桂州總管

馮立同州馮翊人有武藝為廣州都督前後作牧者多贖貨立
不營產業衣食取給而已常至貧泉歎曰此吳隱之所酌泉
也一楮水何足道哉吾當汲而為食安能易吾性乎遂畢飲
而去在職數年甚有惠政

李仁吳王恪子恪四子仁璋琨瓊竝流嶺表光宅中遇赦還歷
岳州人遺以金拒不納武后遣使者勞曰兒吾家千里駒更
名千里累官至安撫大使

王方慶按新唐書列傳王雍州咸陽人則天臨朝拜廣州都督
繼字方慶以字行廣州地際南海每歲有昆侖乘舶以珍物與中國交市舊都
督路元睿冒求其貨昆侖殺之方慶在任數載秋毫不犯當
時議者以為有唐以來治廣州者無出其右

宋璟邢州南和人其先自廣平徙焉少耿介有大節博學工文弱冠舉進士累轉鳳閣舍人當官正色則天重之元宗在春宮太平公主潛謀廢立璟昌言曰東宮有大功於天下真宗廟社稷之主安得有異議乃與姚崇同奏請令公主就東都元宗懼抗表請加罪於璟乃貶為楚州刺史復轉廣州都督廣州舊族皆以竹茅為屋屢有火災璟教人燒瓦改造店肆自是無復延燒之患人皆懷惠立頌以紀其政始自廣州入朝帝遣內史楊思勗驛迓之未常交一言思勗自以將軍貴幸訴之帝帝亦嗟重開元中累封廣平郡公卒年七十五謚文貞

甄亶字道一中山無極人有孝行好學能詩累官夏州都督會宋璟被召代為廣州都督涖事適宜感夏行部感疾卒於官
裴伯先絳州聞喜人炎從子未冠推蔭為太僕丞炎死坐累且誅上召侍臣問當何罪張嘉貞請杖之兵部尚書張說進曰臣聞刑不上大夫以其近於君也故曰士可殺不可辱伯先只宜據狀流貶上如其言嘉貞不悅說曰若貴臣盡當可杖但恐吾等行當及之此言非為伯先乃為天下士君子也開元以來四十年廣州節度清白者惟宋璟李朝隱盧奐及伯先四人

李尚隱其先趙郡人為兵部侍郎時妖賊劉定高夜犯通洛門尚隱坐不能覺察左遷桂州都督臨行帝使謂之曰知卿公忠然國法須爾俄又遷廣州都督去任有贈以金者固辭之曰吾自性分不可改易非為慎四知也尚隱三為憲官輒去朝廷之所惡者時議稱之累官至戶部尚書轉太子賓客卒

年七十五謚曰貞

盧奐滑州靈昌人歷任皆以清白聞天寶初特授南海太守時南海郡利兼水陸瓌寶山積前後太守及節度多坐贓死奐至貪吏歛迹人用安之後入爲尚書右丞卒

李勉字元卿鄭王元懿曾孫也大歷中除廣州刺史兼嶺南節度觀察使番禺賊帥馮崇道等阻洞爲亂陷沒十餘州勉至遣將李觀容等招討悉斬之五嶺平勉性廉潔西域舶來都不檢閱先是至者歲纔四五末年遂至四十餘在官累年車服器用無所增飾及代歸至石門停舟悉索家人所貯南貨投之江中耆老以爲可繼前朝宋璟盧奐李朝隱之徒人吏詣闕請立碑代宗許之

路嗣恭字懿範京兆三原人大歷八年嶺南將哥舒晃反詔加

嗣恭兼嶺南節度觀察使嗣恭擢流人孟瑤敬冕招集義勇間道輕入二人有詭計出其不意遂斬晃誅其同惡萬餘人俚洞之宿惡者皆族誅之五嶺削平商舶之徒多因晃事坐誅嗣恭沒其家財寶不以貢獻代宗銜之故嗣恭雖有平方面功無所酬勞德宗卽位楊炎受其貨始敘前功除兵部尚書及東都畿觀察使徵至京師卒

張伯儀魏州人以戰功隸李光弼軍討平浙賊袁晃功第一擢嶺南節度使樸厚不知書然能推誠委任軍府簡肅人皆便之

杜佑字君卿京兆萬年人爲盧杞所惡出爲嶺南節度使開大衢析屢閉以息火災時德宗在興元朝廷故事往往遺脫舊嶺南節度常兼五管經畧使佑獨不兼故五管不屬嶺南自

佑始也

李復字初陽隴西人以父齊物蔭累官至嶺南節度使勸導百姓令變茅屋爲瓦舍所在稱理

徐申字維降京兆人擢進士第累遷洪州長史嗣曹王皋討李希烈檄申隨征皋表其能遷韶州刺史詔自興兵四十年公田多廢申募人假牛犂墾發以所收半畀之歲入凡三萬斛始涖任時韶戶止七千比六年倍而半之州民詣觀察使以其有功於人請爲生祠申固讓踰年進嶺南節度使外番歲以異香文犀浮海至申於常貢外未常贖索商賈益饒後加禮部尚書封東海郡公詔未至卒年七十謚曰平

趙昌字洪祚天水人拜安南都護夷人率化因屋壞傷脛懇疏乞還德宗召問昌時年七十二而精健如少年德宗奇之復

命爲都護南人相賀尋轉戶部尚書充嶺南節度使

楊於陵字達夫本漢太尉震之裔元和初對策文居第一宰相惡其言出爲嶺南節度使教民陶瓦易蒲屋以絕火患監軍許遂振者悍戾貪肆憚於陵不敢撓以私則爲飛語聞京師憲宗惑之詔歸遂振留事笞吏剔抉其贓吏呼曰楊公尙拒他方賂遺肯私官錢耶宰相裴垪亦爲帝言之乃授吏部侍郎而遂振終得罪

鄭綱字文明擢進士第登宏詞科累官至宏文館大學士憲宗初勵精求理綱與杜黃裳同當國柄黃裳多所關沒綱獨謙默由是貶秩出爲嶺南節度觀察等使以廉政稱

馬總字會元扶風人少孤貧性剛直不妄交遊好學論著頗多在官雖吏事倥偬書不去前元和初累官至嶺南節度使至

廣身著古軀要卷三十五
南海卽修教令明賞罰百粵率服又於漢所立銅柱之處以
銅一千五百斤特鑄二柱刻書唐德以繼伏波之迹穆宗朝
進戶部尚書卒謚曰懿

孔戣字君嚴登進士第元和初授諫議大夫會嶺南節度崔詠
卒三軍請帥宰相奏擬皆不稱旨上謂裴度曰嘗有上疏謂
南海進蚶菜者詞甚忠正此人何在度退訪之或曰祭酒孔
戣嘗論此事度徵疏進之卽日授嶺南節度使旣至免屬州
逋負十八萬緡米八萬斛士之斥南不能北歸與有罪之後
百餘族才可用用之女子則爲嫁遣之南方鬻口爲貨掠人
爲奴婢戣峻爲之禁由是閭里相約不敢犯又蕃舶泊步有
下碇稅始至有閱貨宴所餉犀琲下及僕隸戣皆禁絕無所
求索往詔禱南海神多令從事代祠戣每受詔自犯風波而

往韓愈在潮作詩以美之貞元中黃洞蠻叛容桂二管請合
兵進討戣固言不可帝不聽乃大發兵討之士被瘴毒死者
不可勝計桂管裴行立容管陽雲皆無功憂死戣獨不邀一
旦功而交廣大治

李憲晟第五子太和中轉嶺南節度使雖勳伐之家而皆以吏
能擢用所歷官秩政績流聞性明恕精律學屢詳寃獄活無
罪者數百人以能入官官無敗事士君子多之

崔洪博陵安平人以書判拔萃高等性威重尤精吏術太和初
官嶺南節度使帝問以撫理南海之宜奏對稱旨時高瑀鎮
徐州承智興之後軍驕難制上以珙素有威望授檢校工部
尚書徐州刺史李德裕用事與珙厚累遷至中書門下同平
章事以與崔鉉不叶坐事貶宣宗卽位赦還復知政事未幾

卒

盧鈞字子和本范陽人元和四年進士擢第累官至嶺南節度使南海有蠻船之利凡爲南海者靡不捆載而還鈞性仁恕爲政廉潔一無所取貞元以來衣冠得罪流於嶺表因而物故子孫貧悴鈞減俸錢爲營櫓積疾病則爲醫藥孤兒稚女則爲婚嫁由是山越之俗服其德義三年將代華蠻數千人詣闕請立生祠銘功頌德徼外肅清

韋正貫字公理舉賢良方正異等累官至嶺南節度使南海舶賈始至大帥必取犀象明珠上珍而售以下直正貫至無所取南方風俗右鬼正貫毀淫祠教民無妄所會海水溢人爭咎撤祠事正貫登城沃酒以誓曰不當神意長人任其咎無逮下民俄而水去民乃信之

李承勛營州柳城人智勇出人思繼乃祖光弼之烈大中末節度涇原降吐蕃宣宗聞其將略思試諸遠方會嶺南郡將王令寰作亂詔以大將軍李燧爲嶺南節度使已命中使賜之節給事中蕭倣封還制書上方奏樂不暇別召使使優人追之節及燧門而返上悟遂命承勛爲嶺南節度使討平之奏捷至上歎曰朕幾失人向若用燧豈能定亂哉初忠武軍精兵皆以黃冒首號黃頭軍承勛以百人定嶺南由是五管多效其服裝夷賊聞風而靡百粵沔康承勛倡之也

蕭倣父悟恆之弟也太和中登進士累官至嶺南節度使性公廉家人疾病須烏梅左右取於公厨倣知命還促買於市南海雖富奇珍月俸之外不入其門其潔已如此

韋宙京兆萬年人丹之子也宣宗謂宰相曰丹有子否以宙對

帝曰與好官乃拜侍御史累遷至尚書左僕射同中書門下
平章事弟岫字伯起亦有名

鄭從讜字正求滎陽人會昌中登進士累官至宣武軍節度觀
察等使期年報政美聲流聞當途者懼其大用改嶺南節度
使從讜在鎮北兵寡弱夷獠憐然乃擇土豪授之右職禦侮
扞城皆得其効以久任番禺不樂風土思歸戀闕形於賦詠
僖宗徵還用爲刑部尚書同平章事

劉崇龜咸通中進士爲御史中丞賜金紫出爲嶺南東道觀察
處置等使廣有大賈約倡女夜集而他盜殺女遺刀去賈入
倡家覺而乘扁舫吏迹賈捕効得約女狀而不殺也崇龜方
大饗軍中悉集宰人陰以遺刀易一襍置之詰朝令羣宰即
庖取刀一人不去曰是非我刀問之乃得亡宰置諸法其精

明類此姻舊或干以財不答但寫荔枝圖與之然不能防檢
其家既歿有鬻珠羽者由是損名

李迢隴西人爲嶺南東道節度使黃巢攻陷廣州被執使迢草
表述其所懷迢曰予代受國恩親戚滿朝腕可斷表不可草
巢殺之

李知柔惠宣太子業曾孫也爲宗正卿久之擢京兆尹始鄭白
渠梗壅民不得歲知柔調三輔治復舊道遂無旱虞民詣闕
請立石紀功固讓得止性儉約雖位通顯無居第未幾出拜
清海軍節度使卒於鎮

鍾傅萬載人歷官嶺南節度使時黃巢亂後州縣廢貢舉惟傅
歲薦士行鄉飲酒禮士不遠千里趨之少好獵常醉遇虎斃
之及貴歎曰處世尙智勿效吾暴虎因畫搏虎狀以戒子孫

唐書卷一百三十五
宋慶禮洛州永平人舉明經授衛縣尉則天時侍御史桓彥範受詔於河北斷塞居庸岳嶺五迴路等以備突厥慶禮雅有方略特詔謀其事尋充嶺南採訪使時崖振等五州首領更相侵掠人懼炎瘴莫有到者慶禮躬至其境詢風問俗於是安堵

李琨吳王恪子則天朝歷淄衛宋鄭梁幽六州刺史有能名聖

歷中嶺南獠反勅琨爲招慰使安輯荒徼甚得其宜
李朝隱字光國京兆三原人少以明法舉累授大理丞神龍年功臣敬暉桓彥範爲武三思所構諷侍御史鄭愔奏誅之勅大理詰其罪朝隱以暉等所犯不經未可卽正刑名時裴談爲大理卿奮筆斷斬仍籍沒其家朝隱由是忤旨令貶嶺南惡處中書令李嶠奏曰朝隱素稱清正斷獄亦甚當事一朝

遠徙嶺表恐天下疑其罪中宗意解出爲聞喜令尋轉岐州刺史性孝友素有公直之譽每御史大夫闕時議咸許之及居職無所糾劾惟煩於細務時望由是稍減俄轉太常卿充嶺南採訪處置使卒於嶺外年七十諡曰貞

韋見素字會微京兆萬年人天寶中充黔中嶺南等黜陟使觀省風俗彈糾長吏所至肅然使還拜給事中駁正繩違頗振臺閣舊典

宇文審京兆萬年人父融事元宗以興役受贓詔流巖州審與兄弟侍母京師聞之不告其家徒步號泣達巖州省父後擢進士遷大理評事楊國忠顛政殺嶺南流人議者嫉其酷乃以審爲嶺南監法處置使活者甚眾

柳玘應兩經舉釋褐秘書正字爲高湜所辟踰年拜右補闕湜

出鎮澤潞爲亂將所逐坐貶玘三上疏申理湜見疏本歎曰
我自辨析亦不及此尋出廣州節度副使黃巢陷廣州郡人
鄧承勳以小舟載之脫禍召爲起居郎

宗仲字義仲其先南陽人後家太原有財略廣德初宦官廣州
市舶使呂太一作亂詔以楊慎徽爲嶺南節度使仲爲參軍
與李勉共討之犄角相接者三年仲潛軍間道遂克復廣州
奏捷如京師卒

李翱字習之隴西人幼勤儒學博雅好古始從韓愈遊爲文章
辭致渾厚見推當時貞元中登進士元和中楊於陵節度嶺
南辟爲幕府咨訪得失後攝循州文學爲一方矜式會昌中
官節度使卒

張元素蒲州虞鄉人承乾旣敗德日增元素又上書諫不納乃

遣刺客將加屠害俄屬宮廢元素隨例除名後起授潮州刺
史

王峻滄洲景城人後徙洛陽少孤好學祖有方奇之曰是子當
興吾家擢明經第永徽中爲連州刺史民謠安之景龍末桂
州都督劉幽求放封州廣州都督周貞利必欲殺之峻爲營
救得免由是名益起累遷至同中書門下三品卒諡忠烈終
唐之世刺連州爲名相者峻一人而已按新舊唐書王峻傳皆不言其爲連州刺
史劉禹錫謫連州作刺史題名記有王峻之名禹錫以時人紀時事自非傳訛蓋史傳偶佚之也
常懷德新豐人少習三禮明經及第儀鳳間爲潮州刺史匡山賊
寇郡斬其渠魁餘黨悉散其爲政惟以禮教民民皆化之喪
祭罕有用浮屠者澆訛爲之一變

韋迢京兆人好學工詩景龍初進士開元間爲韶州刺史道經

潭州與杜甫唱和甚多涖韶以清潔爲治工役興作惟修范雲三楓亭而已吏民咸懷其惠

畢都護不知其名東平人起諸生累官至端州刺史御史大夫蕭璿及宋璟嘉其能

柳無忝蒲州人爽之曾孫也開元中官韶州刺史居三年大有政聲

韋倫光乘之子乾元初爲襄州刺史李輔國用事改爲秦州刺史以與吐蕃戰敗坐貶代宗卽位中官呂太一作亂嶺南詔倫爲韶連柳三都團練使太一用賂反間復貶信州隨州司馬後召使吐蕃以功遷太常卿御史大夫屢言朝廷得失爲盧杞所忌進太子少師郢國公卒謚曰肅

劉暹曹州南華人明經及第累官至潮州刺史天資疾惡涖事

以嚴立亭於州治南以勸善良得弟悌者歲勞以羊酒潮俗自是一變弟晏爲楊炎所誣受誅天下寃之比護晏家屬北還而炎適流崖州賜死人莫不以爲快

周君巢太原人元和初爲韶州刺史時柳宗元謫柳州過廣人皆言海上宦寓多賢君巢爲最治尙鎮靜而好餌藥延壽宗元常戒之以書自是卻藥勤政韶人戴之

蔣防字子微淮南人登進士上第以文章擅名元和中知連州事嘗疏楞伽峽水以利涉民德之

陳聽思者潤州人也少歷州縣練達吏治咸通初爲雷州刺史臨政善斷嘗稽詢海道因得夷貊情狀每自閱兵以防海寇攻具皆備寇不敢至雷民安之唐世雷爲下州所置刺史見於紀傳有政績者張採之後柳仲郢及聽思二人而已

張鵬饒州德興人宣宗日謂宰臣曰宜擇文武儒臣爲河南節度掌書記遂以鵬對引見於思政殿吐蕃寇邊鵬率數千騎敗之上嘉賜朱衣金魚懿宗立拜嶺南西道節度使甚有威惠

陳讜字昌言福州侯官人登三吏科累遷春韶二州刺史皆有善政性仁孝居官餘祿悉與交親共之鄉邦稱美

謝肇字景初上猶人閑武技與父率義兵征蠻功第一除韶州刺史屢捕粵寇悉剿平之下詔褒嘉其略曰卿業威機神材雄權變一心許國三奏行符所爲皆及物之恩所到有字人之績後授戶部尙書

劉知謙壽州上蔡人避亂客封州爲清海牙將節度使韋宙以兄女妻之眾謂不可宙曰若人狀貌非常吾以子孫託之黃

巢白嶺表北還湖湘間羣盜蟻結知謙因據封州詔授刺史兼賀水鎮使以邊梧桂知謙撫納流亡得精兵萬人多具戰艦境內肅然久之疾病召諸子勉以建功眾推其子隱爲嗣劉昌魯字安國相州鄞縣人唐末明經登第累遷尙書郎乾符中出爲高州刺史劉隱入廣州遣其弟襲攻高州昌魯大敗襲軍慮終爲所吞乃輦帑庫及士卒千餘人歸湖南馬殷天成中卒

竇漢扶風人父思亮卒官家事日落漢明經不第意淡如也後以名家子被舉爲鴻盧丞中宗欲立安樂公主爲皇太女以問禮官漢奏曰京房易云陰當陽大不祥昔天后御龍於南面今公主駕鶴於東宮皆大亂之道也帝惡其悻直出爲忠州端州長史厲志臨政聽煩制劇民甚宜之

伊慎字寘悔兗州人通春秋戰國策天官五行書大厯中節度使路嗣恭討嶺南哥舒晁之亂以慎爲先鋒破之未幾追斬晁於泔溪以功授連州長史

韋京兆杜陵人明經上第起家汾州參軍累官至韶州司馬檢身一德在郡數載息訟清刑

元仁惠河南洛陽人幼岐嶷有器局幹事動中繩墨爲河源縣令終涼州長史所在克己爲政蠻貊化其忠北人處南略無少疚惠聲彰於嶺海

張祐字承吉清河人元和中作宮體小詩辭曲豔發老大稍窺建安風格由是賢俊之士多與之遊或薦於天子書奏不下受辟諸侯府性狷介不容物輒自劾去以曲阿地古淡遂種樹築室而家焉性嗜水石常悉力致之後知南海微若甲香詹餽一無所受期月間罷職載羅浮石筍還不蓄善田利產爲身後計真廉吏也太和中卒晉有丹陽集

廣東考古輯要卷三十六

名宦二

南漢

趙光裔字煥業京兆奉天人僑居洛陽力學修行與兄光逢弟光允皆第進士乾甯中兄弟對掌內外誥命時論榮之後俱仕梁光裔自以唐甲族恥事偽國常怏怏思歸及高祖稱帝遣使間道至洛陽召其家屬光裔驚喜由節度副使進兵部尚書同平章事為相二十餘年府庫完實四鄰輯睦邊境無恐當時號稱賢相又兄光逢相梁弟光允相後唐子損相繼為相五季之世一家四相為當時歆羨

王定保南昌人舉唐光化中進士南遊湖湘遭亂不得還烈宗招禮之辟為幕屬高祖欲僭號憚定保不從先遣定保使荆



南及卽位而定保回知其心未善也預使倪曙迎勞之大有
初官甯遠節度使後代趙損同平章事善文辭高祖嘗作南
宮極土木之盛定保獻南宮七奇賦以美之一時稱爲絕倫
周傑善星厯唐司農少卿常著極衍二十四篇以究天地之數
時天下方亂傑以天文占云惟嶺南可以避地乃遣弟鼎求
爲封州錄事參軍天復中攜家來南烈宗習其名招至幕府
待之上賓數問天道災變高祖卽帝位令知司天監事命占
國祚傑以周易筮之遇比之復斷曰卦有二土土數生五成
於十二五相比以歲言之當五百五十高祖大喜賜資有加
逮後主降宋適得五十五年蓋傑舉成數以避害謬稱十爲
百也後遷太常少卿卒年九十餘
謝傑爲高州刺史境多虎夜入郭中爲暴人不安居傑一日沐

浴詣城隍神舉酒祝曰愚民何辜而虎暴之此刺史無德化
願虎但食刺史無傷民因獨宿殿庭是夜漏三下廟東南隅
忽有物吼聲如雷良久乃止遲明視之數虎悉斃

曾芳南漢時爲程鄉令因民苦瘴以藥濟之求者接踵乃囊藥
置井中令民汲飲而疾愈後人名其井爲曾井立祠井旁宋
仁宗降詔封芳爲忠孝公又賜飛白書曾氏忠孝泉五大字
芳他政無所考然厯六七百年之後而名傳不朽雖兒童走
卒過其祠井咸加禮拜其感人如此

謝貫積功爲將軍素有膽勇喜慶戰取名一時乾和中與潘崇
徹攻陷郴州由是嶺表土地益廣

吳珣爲將善出奇計厯官至巨象指揮使與吳懷恩攻賀州楚
人來救珣鑿大穿於城下覆箔於上以土傅之楚將徐知新

等逼城珣遣人自穴中發機楚人陷弃死者無算卒克賀州
萬景忻少以驍勇積功至指揮使殤帝初立循州賊張遇賢作
亂帝命越王宏昌循王宏杲征之師敗二王爲所困景忻力
救得免後復敗遇賢於循州循州平景忻功爲第一
蘇章以牙校事高祖積功至左右街使驍勇善戰而行軍多合
古法遂爲一時名將子五人俱爲中郎將豪俠任氣當世號
五郎將大有初楚人舉水軍侵封州章將神弩三千戰艦百
艘往救既至賀江沉鐵縵於水中爲巨輪築堤兩岸以隱之
因輕舟迎戰陽敗而奔楚人以爲怯也逐之章舉巨輪挽縵
鎖楚舟舟不得進退乃用强弩夾江射之楚人大敗解圍去
進章封州團練使同時梁克貞有勇略而亞於章交州之亂
高祖命克貞征之南蠻大恐讐服兵威貫克貞力也

孫德威勇敢有氣力數從高祖征伐戰鬪常冠軍

按五代史南漢世家作孫

德威

宋

潘美字仲詢大名人士儻隸府中典謁常語其里人王密曰
漢代將終君臣肆虐四海有改卜之兆大丈夫不以此時立
功名取富貴碌碌與萬物共盡可羞也先是太祖遇美素厚
及受禪命美先往見執政諭旨中外時陝帥袁彥兇悍信任
羣小大祖慮其爲變遣美監其軍以圖之美單騎往諭以天
命旣歸宜修臣職彥遂入朝上喜曰潘美不殺袁彥能令來
覲成我志矣嶺南劉鋹數寇桂陽太祖以美爲行營諸軍都
部署朗州團練使擊破之鋹窮蹙遣其臣王珪求通好又遣
蕭灌奉表乞降美因諭以上意以爲彼能戰則戰不能戰則

守不能守則降不能降則死不能死則亡非此五者他不得受卽部送淮等赴闕張復遣其弟保興率眾拒戰兵十五萬依山谷編竹木爲柵堅壁以待美以火攻之會天大風萬炬俱發張眾大敗遂擒張送京師露布以聞卽日命美知廣州兼市舶使嶺南道轉運使嶺表遂安

尹崇珂秦州天水人後徙居大名初事周世宗以謹厚稱太祖卽位出爲滑州刺史有善政民詣闕請刻石頌德太祖命侍御史李穆撰文賜之後與潘美克廣州擒劉鋹卽日詔與潘美同知廣州兼市舶使錄功遷保信軍節度

王明字如晦大名成安人晉天福中舉進士不第周廣順初劉崇寇晉州命陳州防禦使元福將兵援之奏署判官事多咨於明後元福恃功驕恣明以直道規之因見疏宋初召公卿

近臣各舉清白有吏幹者一人給事中馬士元以明塞詔召爲左拾遺會嶺南用兵明與潘美等破劉鋹眾十餘萬焚其柵張以城降廣州平太祖嘉其功累遷至嶺南轉運副使邊珣字待價華州鄭人晉天福中舉進士爲校書郎太祖卽位充廣南轉運使初至桂守張頌卒藁葬城外舊例不許以族行僕人乃分匿其財珣追取之送其柩歸

向敏中字常之開封人父瑀惟敏中一子躬自教督嘗謂其母曰大吾門者此兒也及冠能刻厲自立成進士權判大理寺時妖尼道安構獄事連敏中妻父判官張去華以故得請不預決獄旣而以親累落職出知廣州兼掌市舶入辭面叙其事太宗感動前守多涉譏議敏中預市藥物以往至荆南無所預以清廉聞性端厚多智曉政體累官至昭文館大學士

居六任三十年時以重德目之卒年七十二帝親臨哭之慟
凌策字子奇宣州涇人雍熙中舉進士累官至廣州有幹名先
是嶺南輸香藥以郵置卒萬人煩役爲患詔策規制之策請
陸運至安南汎舟而北止役卒八百大省轉送之費人以爲
便

黃震字伯起建州蒲城人進士及第擢江淮發運使既至發李
溥姦贓溥坐廢震亦罷官尋知饒州徙廣東轉運使廣南歲
進異花數十本至都多枯死者道路苦其煩擾震奏罷之
胡則字子正婺州永康人以進士起家補許田縣尉入奏太宗
問以邊策對稱旨顧左右曰州縣豈乏人命記姓名中書累
遷員外郎真宗時爲廣南西路轉運使有番舶遭風告乏食
則命貸錢三百萬吏白夷人狡詐已而償所貸如期又按宜

州重辟十九人爲辨活者九人丁謂貶崖州時賓客隨散則
闕遣人至海上饋問其喜交接尙風義如此

郎簡字叔廉杭州臨安人幼孤貧借書錄之多至成誦進士及
第爲福清令縣有石塘陂久湮塞募民浚築旣廢田百餘頃
邑人爲立生祠徙藤州興學養士一變其俗藤至是始有舉
進士者累遷廣南東路轉運使以工部侍郎致仕

張昱之字景山進士及第補樂清尉蔡齊薦其才可用累遷至
廣南東路轉運使所至有聲後以光祿卿致仕退居築家廟
率子弟歲時奉祀

王綵字敦素會稽人祥符中進士累官至廣南東路按察使時
交趾有變而廣州當交趾之衝無城守綵議陶磚爲城造大
艦習水戰以禦之

杜杞字偉長以蔭知建陽縣累官至廣南西路轉運按察安撫使時區希範誘白崖山蠻蒙趕反嶺外騷然杞勒兵攻破白崖黃阮九居山砦誘降希範及趕誅之海南遂平

王罕字師言華陽人以蔭知宜興縣累遷至廣東轉運使儂智高入寇罕行部在潮廣州守仲簡自圍中遺書邀罕罕報曰獨歸無益當求所以相濟者遂還惠州州之惡少相率爲盜惠人要罕出城遮道求救護者千數計罕召父老問以策曰吾屬皆有田客欲給以兵使相保聚罕曰有田客者如是得矣無者奈何乃呼耆長發里民補壯丁而集募有方略者許以官秩於是染庫帛爲旗斷苦竹數千銛其末使操爲兵向之惡少皆隸行伍建旗伐鼓順流而下將至廣智高見已嚴備不敢犯遂解去

元絳字厚之錢塘人生而敏悟五歲能作詩九歲謁荆南太守試以三題上諸朝貧不能行長舉進士以廷試誤賦韻得學究出身再舉登第調江寧推官范仲淹表其才知永新縣擢江西轉運判官儂智高叛以絳爲廣東轉運使瀕江建水砦數十又繕治十五處樓堞器械皆備軍食有餘以功累官至開封府拜三司使參知政事

龐籍字醇之單州武城人及進士第累官至廣南東路轉運使昭文館大學士持法深峭士卒畏服治民數有惠愛儂智高反師數不利朝廷遣狄青爲宣撫使諫官韓絳謂武人不宜專任帝以問籍籍曰青起行伍若以文臣副之則號令不專詔嶺南諸軍皆受青節度旣而捷書至帝喜曰青破賊卿之力也

唐書本傳卷一百一十一
榮諲字仲思涪州任城人舉進士官廣東轉運使廣有板步古
河路絕險林菁瘴毒諲開真陽峽至泚口古徑作棧道七十
間抵清遠趨廣川遂爲夷塗

蔡抗字子直宋城人進士累官至廣東轉運使番禺歲運鹽英
韶道遠多侵竊雜惡抗命十舸爲一運擇攝官主之歲終會
其殿最增五十萬緡英宗立召爲三司判官廣南去京師遠
不卽至帝見南來者必問之及人見諭曰卿乃吾故人朕望
於卿者厚勿以常禮自疏也

林光朝字謙之興化軍莆田人再試禮部不第聞吳中陸子正
嘗從尹焯學因往從之遊自是專心聖賢踐履之學通六經
貫百氏四方來學者亡慮數百人南渡後以伊洛之學倡東
南者自光朝始孝宗隆興元年光朝年五十以進士及第進

國子司業兼太子侍讀是時張說再除簽書樞密院事光朝
不往賀遂出爲廣東轉運副使值嶺南茶寇方張光朝督將
遮擊敗之賊遁帝聞之喜曰林光朝儒生乃知兵耶

冷應澂字公定隆興分寧人寶慶元年進士調廬陵主簿卽以
廉能著有愬事臺府者必曰願下廬陵清主簿尤爲楊長孺
所識拔景定元年奉使督餉江上還知德慶府前守政不立
縱豪吏漁獵洞獠遂大爲變應澂未入境馳檄諭之獠感悟
欲自歸感謀主不果眾稍引去應澂知其勢解卽厲士馬出
不意一鼓擒之遣使歸農而誅豪吏之激禍者後累官至廣
南經略安撫司

趙希洎宗室子居宜春歷官至戶部尙書以迂丞相賈似道出
領廣東轉運使德祐中與從子必向避地贛州文天祥兵敗

廣東省志卷三十一
以失言與必向俱被囚辭節愈厲家人饋食則碎器覆諸地
俱不食死

曹利用字用之趙州晉甯人慷慨有志操歷官至忠州刺史賜
第京師祥符中知宜州劉永規馭下殘酷爲眾所殺嶺南騷
動帝以利用曉方略授廣南安撫使利用至嶺外遇賊武仙
縣賊健標蒙采盾衣甲堅利鋒鏑不能入利用持巨斧長刀
破盾遂斬賊嶺南平

魏瓘字用之由校書郎歷官至循隨安州提點廣南西路刑獄
劉鋹時計口以稅雖舟居皆不免至是而電化欽廉高州猶
未除瓘爲除之尋以罪降知洪州遷太常少卿知廣州築州
城環五里疏東北門鑿東西澳爲水閘以時啟閉後儂智高
寇廣東西獨廣州城堅守不能下於是論築城功遷工部侍

郎集賢院學士復知廣州兼廣東經略安撫使

楊旼字樂道保靜軍節度使重勛之曾孫進士及第知岳州以
平湖南獠人唐和之亂遷太常博士歲餘賊益肆乃授旼東
染院使荆湖南路兵馬鈐轄賊聞旼至踰嶺南遁又詔往韶
連等州招安之約賊使出峒授田爲民而轉運使欲授以官
與貲納質使還旼曰賊勤攻湖廣七年所殺不可勝記今使
飽貲糧據峒穴其勢不久必復亂明年春賊果復出陽山旼
領眾出嶺外涉夏秋凡十五戰賊潰旼感瘴疾歸蠻平願還
舊官久之擢天章閣侍制進龍圖閣直學士

孫沔字元規會稽人登進士第歷官樞密直學士儂智高反以
沔爲湖南江西路加廣南東西路安撫使及行才與兵七百
會遣狄青爲安撫使與智高遇戰歸仁鋪智高敗走廣南平

西至京帝問勞解玉帶賜之

田瑜字資忠河南壽安人舉進士提點廣南西路刑獄儂智高反瑜條上用兵禦賊十事智高平召對便殿具言南方山川險要所以備守之策乃以為廣南東路體量安撫使

張田字公載澶淵人登進士第知應天府司錄歐陽修薦其才歷知湖廬等州有善跡移桂州異時蠻使朝貢假道與方伯抗禮田獨坐堂上使引入拜於庭而犒賄加禮年五十四卒為人抗直臨政以清作欽賢堂繪古昔清刺史豫師拜之蘇軾嘗讀其書以侔古廉吏

王靖字詹叔太尉旦從孫也早孤自力於學好講切天下利害以祖蔭歷通判閩州知滁州主管北京御史請復明經科加試貢士以策觀其所學稍變聲律之習後徙廣南轉運使熙

甯初廣人訛言交阯且至老幼入保事聞中外以為憂神宗曰王靖在彼可無念

居簡河南人宰相蒙正之子初為殿中丞歷官至龍圖閣直學士知廣州陶質瑩城人以為便

程師孟字公闢吳人進士甲科累知南康軍楚州提點夔路刑獄有治行徙知廣州州城為濃寇所毀師孟在廣六年作西城及交阯陷邕管聞廣守備固不敢東時師孟已召還朝廷念前功以為給事中集賢殿修撰為政簡而嚴洪福廣越為立生祠

郭達字仲通洛州人家世以武功稱范仲淹勉以問學熙甯中李乾德陷邕管詔以達為廣南招討使兼宣撫使大戰富良江敗其精兵斬偽王子洪正乾德懼奉表歸降

曾開字天游其先贛州人徙河南府少好學善屬文崇甯間登
進士第累官至廣東經略安撫使奉詔駐潮陽招捕劇寇訖
事乃之鎮居三年盡平羣盜

龔茂良字實之興化軍人紹興中進士第爲安南部邵武司法
父母喪哀號擗踊鄰不忍聞調泉州察推以廉勤稱除監察
御史遷右正言會內侍李珂沒贈節度諡靖恭茂良諫曰中
興名相如趙鼎勲臣如韓世忠皆未有諡今施於珂爲可惜
竟寢其諡嘗論龍大淵曾覲姦回疏人不報後爲廣東提刑
就知信州卽番山之阯建學又置番禺南海縣學旣成釋奠
行鄉飲酒以落之以罪安置英州父子卒於貶所上後察其
無罪復資政殿學士諡莊敏

潘時字德郵婺州金華人以叔良貴任爲登仕郎累遷至廣南東

路經略安撫使司廣東地接郴桂汀贛之境四州之民一踰
嶺貿易折閱卽相聚爲盜時入境捕得渠卒斬以徇於是皆
散有梁氏兄弟者招納亡命殺人而掠其貲以致富交通州
縣吏不敢詰民患苦之號爲四彪時擒捕誅殺汙瀦其居他
盜望風破膽良民旣少安乃陰募其酋豪使以捕賊自効由
是盜發輒得官屬不幸死者厚賻歸老稚無一人流落後終
朝議大夫直顯謨閣卒

曾治鳳字君儀晉江人開禧元年進士歷官廣東提刑性簡儉
愛惜公帑未嘗妄費不嗜殺戮遇寇必諭降之會戍卒挺亂
薄廣城時已解印引咎丐罷奉祠數年卒

陳峴字山甫温州平陽人少篤學工文辭成進士中博學宏詞
科歷官有政聲嘉定元年知廣州軍州事充廣南東路經略

安撫使馬步軍都總先是邑民苦預借峴至蠲諸邑宿逋四萬六千緡奏於朝無得預借民獲蘇息廣學宮治城壕設闢門瀦水以備不常閱歲百役並興勞費不憚時獠寇部界謀窺州城城以南戶口繁夥舊無捍蔽乃募勇敢軍日加訓練築東西雁翅城以翼之郡號多士貢額纔十三峴爲請於朝增額爲二十五帥廣二年政務寬簡民甚德之嘗以政暇委州文學齊琥監鹽倉季端仁編南海志成一方信史以功封永嘉郡開國子食邑五百戶

徐清叟字直翁浦城人第進士歷官廣東經略安撫使嘗薦用真德秀魏了翁風度凜然

楊長孺字子伯別號東山潛夫以蔭補守湖州累官至廣東經略安撫使知廣州事每對客曰士大夫清廉便是七分人矣

嶺南羣吏獨有長孺清白著於時有詔獎諭謂其清似隱之故長孺賦詩有詔謂臣清似隱之臣清原不畏人知之句卒年七十九郡人立像與吳隱之合祠

方大琮字德潤福建莆田人帥廣凡六年以儒飾吏以政儉俗鄉飲酒禮久廢命賓佐與領袖士討論之禮樂器服悉還古制歲一行之丁祭儀文未稱悉考古訂禮改作又建書堂之飛閣翼以四齋規模十倍於昔

唐璘字伯玉古田人舉進士時臺臣李安行奏次對官不許論邊事璘對策極詆之曰吾始進可壞於天子之庭乎累官至廣東經略安撫使擢太常少卿立臺僅百日世謂再見唐介切劘上躬盡言無隱帝益嚴憚居官大節則母教之助爲多劉應龍字漢臣端州高安人嘉熙二年進士歷官至廣東經略

安撫使時南海寇作聞應龍至遁去德祐元年遷工部尚書
江西兵鈐轄青海軍節度使力辭隱九峯子元高亦舉進士
胡穎字叔獻潭州湘潭人紹定中登進士歷官浙西提點刑獄
移湖南兼提舉常平性不喜邪佞尤惡言神衡州有靈祠徹
之作來諗堂以奉母居嘗語道州教授楊允恭曰吾夜必瞑
坐此室察影響咸無有允恭對曰以爲無則無矣從而察之
則是又疑其有也穎甚喜其言以樞密院承旨爲廣東安撫
使先是潮州僧寺有大蛇前後仕潮者皆信奉之會旱人咎
守不敬蛇守不得已詣焉驚卒穎至廣州聞其事令僧以檻
載蛇至大如柱而色黑令之曰爾爲神當三日見變怪否則
爾無神矣及期蠢然猶眾蛇耳遂殺之毀其寺並罪僧
謝子強字強學永嘉人登進士寶祐四年帥廣州律已以嚴牧

民以惠來吏以法廣人敬頌德政余復亨爲之記立像與吳
隱之楊長孺並祀

趙與珞爲瓊管安撫使帝昺祥興元年元將略地海外率義勇
禦白沙口極力死戰舟師不得登岸元將患之後因購內應
執與珞不屈遂遇害珞素有膽略海外諸蠻小國皆倚重之
旣死悉附於元

劉几字伯壽洛陽人儂寇犯嶺南以几爲廣東西提殺使大戰
於歸仁鋪破之

周渭字德臣昭州恭城人建隆初進士爲廣南諸州轉運副使
奏去劉鋹時稅算之繁者定田賦興學校

歐陽載字則之廬陵人修仲父也進士乙科真宗嘗自擇御史
載以秘書丞召見見者數人皆自薦載獨立墀下無所說明

日拜監察御史中丞王嗣宗指曰是獨立墀下者真御史也
後爲廣南東路轉運副使秩滿以敝舟還無一海上物

蕭世京字昌孺龍泉人嘉祐中進士爲廣東轉運副使有清譽
蔡京爲相奏舉十事京銜之罷

孫載字積中崑山人登進士爲廣東轉運判官案無滯牘人頌
其廉能暇卽遊羅浮訪古賦詩好汲引士類受薦者至四百
餘人多知名喜讀書著釋解五十卷後致仕疾革問日早晏
盥手焚香而逝

黃洧字清臣甌甯人以父蔭除知南雄州乾道四年改廣南東
路提舉市舶帥守更爲轉運判官廣學租禮名士益勸諸生
以學劾吏之不循度以病民者於是一路肅然官吏始知有
法守矣按行所部雖烟瘴荒遠無所憚訪問疾苦伸理冤抑

不可勝計江浙歲飢有旨發二廣義倉米航海詣永嘉往時
常有此役吏緣以擾民而米不時達洧處之有方不越月而
至永嘉者八萬斛永嘉人焚香迎拜步下曰此廣東運使活
我也卒朱熹爲銘其墓

劉克莊字潛夫興化莆田人通古今熟典故最爲眞德秀所知
理宗朝嘗爲廣東提刑仰慕崔清獻公與之歎曰公之完名
高節百世師也官至工部尙書龍圖閣學士致仕卒謚文定
敖陶孫字器之福清人少倜儻有大志爲文章援筆立就弱冠
鄉薦遂補入太學韓侂胄逐朱熹陶孫首以詩送之趙汝愚
謫死陶孫哀之以文揭詩於通衢云九原若遇韓忠獻休說
渠家末世孫後登進士爲廣東運判詳讞明允

洪天錫字君疇泉州晉江人寶慶二年進士歷官至監察御史

累疏言天下之患謂朝廷輕給舍臺諫輕百司庶府而北司獨重倉卒之際臣實懼焉言雖不果行然終宋世而閹人不能竊弄主威者天錫力也後遷廣東轉運判官決疑獄劾貪吏治財賦皆有法

賈黃中字媯民滄州南安人父玘字仲寶天福中進士嚴毅善教子士大夫子弟來謁必諄諄誨誘之黃中幼聰悟方五歲玘每旦令正立展書悉比之謂之等身書課其誦讀六歲舉童子科七歲能屬文觸類賦詠父常令蔬食曰俟業成乃得肉食十五舉進士授校書郎集賢校理建隆中判太常理院黃中多識典故每詳定禮文損益得中號為稱職嶺南平以黃中為採訪使廉直平恕遠人便之

李崇矩字守則潞州上黨人太平興國中由邕貢等州巡檢使

移瓊崖僭萬四州都巡檢使軍士憚於行崇矩盡散器皿金帛凡直數百萬悉分給之眾乃感慨黎賊擾動崇矩抵其洞穴撫慰以己財遺其苗長在嶺海四五年眾皆懷附

秦羲字致堯江甯人世在江左知書好為詩喜賓客饒有士風太祖召見悅其趨對詳謹補殿直令督廣洛漕船大中祥符初廣州海兵桀驁軍中不能制上以羲有材幹授供備庫使充廣州鈐轄積勤練習號為稱職

陳堯叟字唐夫解褐光祿寺丞累遷至廣南西路轉運使嶺南風俗病者禱神不服藥堯叟有集驗方刻石桂州驛又以地氣蒸暑為植樹鑿井每三二十里置亭舍具飲器人免渴死會諸路課民種桑堯叟上言曰臣所部諸州地少蠶桑民除耕田外地利之博者惟麻苧爾麻苧所種與桑柘不殊周

歲之間三收其芻始離田疇即可紡績臣以國家軍需所急
布帛爲先因勸諭部民相率樹藝今杼柚之功日以滋廣布
帛之供所得益多望自今許以所種麻苧頃畝折桑棗之數
詔從之後以平蠻功拜樞密學士

李允則字垂範濟州團練使謙溥子也以蔭補衙內指揮使真
宗時進高州團練使有材略不事威儀身無兼衣食無重饜
洞知人情盜發輒獲人莫知其所由訟至無大小面訊立斷
善撫士卒皆得其用

蔣偕字齊賢華州鄭縣人幼貧有立志父病嘗割股以療父愈
詰之曰此豈孝耶曰情之所感實不自知也舉進士補韶州
司理參軍儂智高反爲廣南東西路鈐轄後爲賊所害

蕭注字巖夫臨江新喻人磊落有大志尤喜言兵舉進士攝廣

州番禺令儂智高圍州數日攻城南勢甚急注自園中出募
海濱壯士得二千人乘大舶集上流因颶風起縱火焚舟破
其眾城中人始有生意將偕上其功擢禮賓副使廣南駐泊
都監

郝亶字正夫太倉農家子自幼讀書中嘉祐中進士熙甯三年
詔天下陳理財省費興利除害之策亶自廣南安撫司爲書
陳蘇州水利王安石善之五年授司農寺丞提舉興修西浙
水利民不爲便遂罷歸治所居之西水田曰大泗濱者如所
陳之說歲入甚厚圖狀以獻且明前法非苟然者復爲司農
寺簿出知温州

蘇緘字宣甫泉州晉江人舉進士調廣州南海主簿州領蕃舶
每商至則擇官閱實其貨商皆豪家大姓習以客禮見主者

緘以選往商樊氏輒升階就席緘詰而杖之樊訴於州州召責緘緘曰主簿雖卑邑官也商雖富部民也邑官杖部民有何不可州不能詰後知英州儂賊圍廣緘曰廣吾都府也今城危在旦夕不可不往救即募士數千人分兵先扼其歸路布槎木亘四十里賊勢沮將解去至不得前乃遠出數舍渡江而西緘與戰摧傷甚眾時諸將皆罷獨緘有功仁宗喜遣中使賜之朝衣金帶

趙士崱字仰夫太宗五世孫以蔭補官建炎初隆祐太后幸洪州敵奄至百司散走士崱至一船中見二帝御容負以走遇潰兵欲聚為盜士崱諭之眾聽命乃走謁太后虔州會虔民作亂鄉兵在外為應士崱詣執政謂當請太后急肆赦赦既下城中遂定

毛炳廣西富川人個儻不羈好讀書乾道中以平寇功陞廉州都巡檢使寇犯境死於難

陳韓字子華福州侯官人從葉適學登開禧元年進士知隆興府時賴寇陳三槍據松梓山若出沒江西廣東屠殘殆甚韓多所陳奏詔節制江西廣東福建三路捕寇軍馬所至克捷又分兵守太石堡截賊糧道遂破松梓山三槍就擒斬之賊平帝以韓忠勤體國計慮精審詔為工部侍郎

趙汝暨宋宗室也兩帥廣前後凡五年公勤清平終始如一獄吏舊以鞠賊為奇貨一盜坐囚百家股慄一切禁絕民受其賜州貢院舊苦湫隘廣斥之出入場屋者咸以為便

袁杭字立之洪州南昌人累官至提點廣南東路刑獄破浙中叛卒鄂鄰於海南平之遷光祿少卿喜藏書至萬卷江西士

大夫家鮮及也

盧草字仲辛德清人少舉童子科知杭州馬亮見其詩嗟異之秋貢士密戒主司弗遺草聞語人曰以私得薦吾恥之去弗就後二年遂首選登第年方十六慶曆中知龔州後提點廣東刑獄以廉明著聲神宗稱之

周敦頤字茂叔道州營道人以舅龍圖閣學士鄭尚任爲分甯主簿歷合州判官熙甯中呂公著等薦爲廣東轉運判官提點刑獄以洗冤澤物爲己任行部不憚勞苦雖瘴癘險遠亦緩視徐按以疾求知南康軍因家廬山蓮花峯下前有溪合於湓江取營道所居濂溪以名之年五十七卒

林積字公濟龍溪人慶曆中循州判官嘗覆盜獄多平反忤部使者意初使者欲薦積因是已之積笑曰失一薦章兩活五

十八人吾何憾焉神宗嘉其廉能除江西運判徙廣東提刑皆有政績

陳中復字從道莆田人熙甯中進士轉廣南東路提點刑獄會劉三花嘯聚潮梅循惠皆騷動徽宗手割委中復規畫不踰月賊平

郭孝友字次仲浙之龍泉人政和進士歷提點廣南東西路刑獄捐騶從躬按歷貪懦守令劾奏不宥累官工部侍郎秦檜與金約和廷議多不合檜以孝友同舍生冀其附己孝友曰議和非至計願密思之檜不懌曰孝友亦爾耶

楊萬里字廷秀吉州吉水人中紹興中進士爲永州零陵丞時張浚謫永州杜門謝客萬里三往始見之浚勉以正心誠意之學萬里服其教乃名讀書之室曰誠齋後浚入相薦之朝

累官至廣東提舉常平茶鹽盜沈師犯南粵討平之孝宗稱之曰仁者之勇就除提點刑獄請於潮惠二州築二砦潮以鎮賊之巢惠以扼賊之路俄以憂去

廖德明字子晦南劍人少學釋氏及得龜山楊時書讀之大悟遂受業朱熹登乾道中進士初爲潯州教授爲學者講明聖賢心學之要手植三柏於學潯士愛敬之如甘棠後知潯州選廣東提點刑獄彈劾不避權要歲當薦士朝貴多以書託之德明日此國家公器也悉不啟封還之時盜陷桂陽迫韶韶人懼德明宴笑自如遣將馳擊敗之乃分戍守遠斥堠韶晏然如平時徙知廣州立師悟堂刻朱熹家禮公餘延僚屬及諸生親爲講說嘗語人仕學之要曰德明自始仕以至爲郡惟用三代直道而行一句

楊大異字同伯從胡宏受春秋大義登嘉定中進士遷大理寺丞平反冤獄者七召對極言時政得失忤宰相意出知禮州進直秘閣提點廣東刑獄兼庾事訪張九齡曲江故宅建相江書院以祀九齡所至姦吏屏息寇盜絕跡凡可爲民興利除害者必奏行之廣海幅員數千里道不拾遺報政爲最何坦廣昌人少貧好學成進士提刑廣東杜絕請託洗冤澤民以廉平爲嶺南首稱

吳與字可權漳浦人知四會縣有循良風嘗論事憲臺燕若蒙厲聲曰乃欲效漢唐令耶答曰固願學之恨不至耳後爲廣東提刑

鄒非熊字宗望宜黃人登進士授樂昌尉修復石渠以溉民田民有去思辟曲江令平反獄事活死囚十二人甚服之官至

廣東提刑

余炎字伯華永豐人登進士第授廣東提刑持己廉潔當時立廉碑炎居其一

陳光祖字世德除廣東提刑作欽恤編以戒僚屬新濂溪祠以崇道學官至朝奉郎

芮華字國器烏城人登進士嘗和沈長清詩云甯令漢社稷變作莽乾坤秦檜惡之竄化州檜死召爲廣東提刑以文章飾吏事雍容儒雅人推重之

孫馨字叔靜錢塘人年十五遊太學蘇洵滕甫稱之提舉廣東常平篤於行義蘇軾謫居惠州極意與周旋二子娶晁補之黃庭堅女黨事起家人懼馨一無所顧時人稱之

李綸字世美泉州人以蔭歷仕有清操提舉廣東常平適伯兄

維出守恩平酌於江濱弟兄相勵以清白傳家綸慷慨言曰倘負斯言有如此水投杯於江時江流洶洶杯亭不沒者久之觀者駭歎民歌之曰石門之水清且清良吏一歌千古榮爭如李公投杯盟江流洶洶杯亭至今刻石與吳隱之酌貪泉詩對峙

劉燭字晦伯建陽人與弟韜仲受學於朱熹呂祖謙乾道中舉進士僞學禁興燭從熹武夷山講道讀書怡然自適築雲莊山房爲終老隱居之計後提舉廣東常平奏義倉之敝客丁錢之敝小官奉給之敝舉留守令之敝帝嘉獎之

趙逢龍字應甫慶元之鄞人刻苦自修爲學淹純登嘉定中進士提舉廣東湖南福建常平日具蔬飯坐公署事至卽面問決遣居官自常奉外一無所取爲政寬恕尤究心荒政以羨

餘為平糶本所在民不忍欺

任中師字祖聖進士及第以太常少卿知廣州明日吏白當謁諸祠廟而廨有淫祠中師遽命撤之兼市舶使市舶置使自此始

李執字彥淵杭州富春人進士提舉廣東市舶珍貨一無所取比召還盜邀之隨行書帙而已盜避去

陳穎字奇之泉州人以父蔭入官知海陽縣治以寬慈人號陳佛子

章元振嘉興人廣東提學與秦檜同登第未嘗以私干檜人服其不阿

韓謹字去華晉江人進士調南海尉除教授著詩禮義解上之辟龐長貳稱獎改廣南東路提舉學士自巡尉未再期擁使

持節一方歆羨

李惟清字直臣下邑人知廣州謹敕不苛珍貨一無所取太宗知其廉平嘉獎之

許仲宣字希粲青州人漢進士宋初赴調引對便殿氣貌雄偉太祖悅之太宗時為廣南轉運使性寬恕有心計處變晏然人服其量

張鑑字德明以蔭補供奉官木將家幼能嗜學入衛州霖落山肄業十餘年擢進士第知廣州民條其政績上請刻石三年移朗州溪洞羣蠻數寇擾鑑諭以威信皆俯伏聽命

楊覃字申錫漢太尉震之後太平興國人舉進士擢第知廣州勤於吏事所至以幹濟稱南海有番舶之利前後牧守或致謗議惟覃以廉著遠人便之

陳從易字簡夫泉州晉江人進士及第知虔州會歲大饑有持杖盜取民穀者請一切減死生者凡千餘人擢太常少卿知廣州坐嘗課校太清樓書字非偽誤而從易妄判竄之降直史館尋復職在廣三年以清德聞

狄棐字輔之潭州長沙人少隨父官徐州以文謁路振振器愛之妻以女舉進士甲科知壁州道長安爲寇準所厚累遷太常少卿知廣州代還不以南海物自隨人稱其廉卒家無餘貲子遵度舉進士

劉湜字子正徐州彭城人舉進士審閬州獄活死囚七人知廣州儂賊初平湜練士兵葺械器作鐵鎖斷江路民安之居二年母老求內徙遂徙徐州湜喜曰昔布衣隨計今以侍從官三品復典鄉郡過始望矣

李兌字子西許州臨潁人登進士第知廣州爲政簡嚴人頌之自劉氏納土之後獨兌尤著清節還知河陽

盧士宏字子高新鄭人以父任屢更州縣所至著清名文彥博包拯以廉能薦之遂知廣州或傳安南舟數百泊海中將爲寇嶺徼驚揺士宏灼其非日從賓客遊宴民賴以安

張頡字仲舉其先金陵人徙鼎州桃源第進士累官至廣東轉運使知桂州海南黎人爲中國患頡使一介往呼之出補以牙校喜而去詔問何賞之薄對曰荒徼蠻蠻無他覲得是足矣尋罷兵海外訖無事

蔣之奇字穎叔宜興人以伯父蔭得官擢進士第知廣州以擒妖人岑深加寶文閣侍制南海饒寶貨爲吏者多貪聲之奇取前代牧守有清節者吳隱之宋璟盧奐李勉等十人繪其

象建十賢堂祀之冀變其習

章燊字質夫建州浦城人以叔得象廕應舉試禮部第一官權戶部侍郎知廣州時廣人冒犯鯨波浩殖貨利不知有義以制其欲至於兄弟骨肉急難不顧男女嫁娶至無媒妁案以習俗積久卒未能化日夜思以導之乃以教化所始莫先於學人倫之序莫先於教於是城西之學與尼寺相比乃謀遷於城東番山之前日與學士諸生講論六經士人翕然稱之

唐義問字士宣江陵人質肅公介之子也善文祠居官風力強敏以集賢殿修撰知廣州爲章惇所忌尋貶

留恭字伯禮晉江人丞相正之子嘉泰中通判廣州所至絕餽遺杜請謁捐租省役時稱循吏後知廣州徭亂捕降其豪渠

四十四洞悉平卒弟筠獻備邊五策自江西提刑移知廣州周種字仁熟泰州人熙甯中擢第知廣州番舶抵郡犀象香珠之屬悉選以充獻曰呈樣種一無所受終任不至船務其歸也部人賦詩送行有三年清似鏡之句靖康中卒子方崇擢禮部侍郎

連南夫湖北德安人高宗時累官廣東轉運使新興饑發粟賑濟全活萬計後知廣州擊破大盜七十餘屯民賴以安

陳橐字德應餘姚人登政和上舍第知廣州時兵興後廣東盜賊無安歲橐盡革弊政以恩先之留鎮三年民夷悅服

王宗己字子游長溪人紹興間進士爲增城令治居廣東二十九縣之最上特書其名於御屏秩滿調常熟尋知廣州時待闕者十餘人孝宗指其名示宰執曰是嘗宰常熟者宜授之

官

陳樸字端行永春州人乾道中進士除知廣州革弊例帑羨受代儲錢數十萬上於朝

王益字舜良臨川人安石父也大中祥符間進士及第知韶州獄訟最多號為難治益治之有餘後終員外郎

常九思河內人仁宗時知韶州心樂易而政精勤後藥温及王之才皆知韶州三人並以能理名

陳宗愚不知何許人天聖中知韶州愛民勤政嘗修造東西兩浮橋復造水車引水入城以防火災民蒙其利

劉元剛字南夫吉水人嘉定進士官至韶州守理宗嘗立廉貪二碑元剛居廉碑第四

周彥先字師古泰州人以廕監廣州清遠縣鹽場為轉運使所

留以監市舶他吏方習為奸昧事而彥先獨不買舶中一物後知循州卒於官吏民思之

湯夢觀萍鄉人舉進士知循州時蠻寇劫掠旁郡不敢入其境自相戒曰切莫犯此老子朝廷聞而嘉之

傅大聲字仲廣仙遊人中進士通判循州適寇起大聲調軍奮擊賊遁去乃上禦賊數策漕使劉強學躉之頒行於廣東遂劾守不職以大聲攝州事尋奏為真闔城歡呼曰傅父爾留吾屬有依矣郡圃有老松數株日出紫氣如雲騰空而上及大聲拜守人以為德政所感守上日有例冊錢千緡卻之在循四年民樂其政相率立祠

梁克俊字叔明泉州人嘉泰初知循州積公帑數千以修城葺學循人以其有功於民祠於縣後同郡趙善諱字安之繼知

循州勤恤民隱邦人德之為立生祠

韓京河南人紹興初為廣東鈐轄破大盜七十餘屯威鎮嶺南
後知循州時兵燹之後京一意安輯掃瓦礫立城郭給種與
牛流民載耒來歸守循十年大有功於民罷去循人繪像祀
於學

留正字仲至泉州永春人紹興中進士授南恩州陽江尉宰相
虞允文奇之薦於上極言國家得失孝宗嘉歎書劄中要語
下三省施行後知循州累官至丞相致仕

鄭輪字景行德化人嘉泰中進士尉保昌獲強盜不肯論賞曰
人命可易官乎後知循州卒

宋翊字叔晦煜之孫以蔭補官通判廣州廣帥崔與之辟知循
州募兵益戍以防寇盜急撫字緩催科循民德之

朱挺字烈仲福州人端平中知循州行鄉飲而習民以禮舉科
試而勉士以學適外寇過循挺指揮兵卒俘之殆盡

彭彥班字國器閩人端平中知循州為政平恕去之日士民相
與留像州學祠焉

王舉元字懿臣真定人賜進士出身知潮州江水敗堤盜乘間
竊發舉元夜召里豪計事盜既獲乃治堤闔境晏然潮民德
之

彭思永字季長廬陵人天聖中進士為人端莊恭敬動必以禮
知南海縣盡心民事後知潮州州民歲苦修堤之役思永為
之立法役均而費省民大悅英宗嗣位徙知江甯府潮與江
甯舊多火災思永去未嘗作人以為德政之感庶甯中遷
戶部侍郎致仕

吳達志字信遇惠安人政和五年進士知惠州大興學校延師造士執經者至數百人後知潮州卒於官

黃定字泰之永福人乾道中進士第一累官知潮州爲政務刻惡蘇察潮民德之後祀潮州賢守祠

丁允元字叔中常州人以忠諫謫守於潮增置韓江西岸石洲四架以梁而屋其上民懷之名曰丁公橋後祀名宦

陳宏規字獻可漳州人慶元中知潮州增置韓江東岸石洲二架結如丁公橋名曰濟川後祀名宦

林鏢福州人慶元中知潮州愛民如子州有白丁錢逃亡者素累甲頭民苦之鏢奏免復置田以益學廩構濟川橋以便往來惠政甚多祀名宦

孫叔謹字信之漳州龍溪人寶慶中知潮州訟牒累至數百悉

五鼓坐廳事剖決如流公勤自勵創橋築堤復撥田於學以養士潮人感其惠而尸祝於韓山昌黎廟今祀名宦

鄭良臣福州人知潮州舊有白丁錢催科者據籍取辦雖遷徙物故不爲除良臣易籍更編民賴以安又增置田稅於學及韓山書院以爲養士費蓋有功於士民者今祀名宦

陳圭字表夫興化人知潮州新原道堂扁其前楹曰書莊置晦菴所著書籍實之立書院田爲養士費蓋有功於名教者祀名宦

洪天驥字逸仲少有異質貫通經史百家登進士較藝南官得文天祥卷置之上第人服其明後知香山縣至之日以教養人材爲首務邑以大治經略使洪勳等以邑最上除大理寺丞終知潮州與兄文毅公天錫文學齊名時謂二洪卒文天

祥狀其行實

陳奕福州人世所稱古靈先生陳襄之曾孫也持節嶺南首復韶郡東橋民不病涉又創安仁宅以居官族之流落無依者治績居最

劉安雅紹興中知梅州虔賊陳榮等圍城安雅命取鉤吻草研汁浸酒散於民賊入民居縱飲死者百數賊疑懼遁

柯宋英字子飛泉州人紹興中進士知梅州古有隱君子程旼以德行聞州人思之與韓文公並祠於學宮宋英闢郡齋名曰景程任滿代還杜門謝客稀識其面者

顏慵字養正晉江人以太學生登開禧元年第歷南海令有惠政以考最知梅州贛寇陳三槍萬眾逼梅城四十二日慵激厲將士分隅拒守賊遁帥表上其功會病卒

蒲壽晟知梅州性儉約於民一毫無取每思曾井遺澤建石亭於上進士楊圭題其亭有日曾氏井泉千古冽蒲侯心地一般清

張士遜字順之祖裕嘗主陰城鹽院因家陰城士遜生百日始啼及長舉進士翰林學士楊億薦為監察御史貢舉初用糊名法士遜為諸科巡捕官以進士有姻黨請避去真宗記名於御屏自是親嫌者皆移試著為令徙廣東至南雄奏除苛政蠲戶役十餘事後拜太傅封鄧國公卒諡文懿

章得象字希賢世居泉州高祖仔鈞仕閩遂家浦城得象母方娠夢登山遇神人授以玉象及生父免復夢家庭積芻如山及長莊重好學進士及第累官至南雄州徙洪州楊億以為公輔器薦之或問之億曰閩士輕狹而章公深厚有容此其

貴也後入相封郇國公謚文簡初聞人謠曰南臺江合出宰相至得象相時沙湧可涉云

潘遵字際可茶陵人紹聖間知南雄州作興學校大有政聲州學諸生祀之學宮

連希覺字民先不知何許人紹聖二年知英州崇甯中復知南雄州伐石築陂引水溉田人感其惠號曰連陂至今賴之

范處厚紹興人崇甯中知南雄州大觀初詔製孝弟睦婣任卹忠和八行之選每路以三人爲率詔下二年嶺南十五郡無應選者處厚悉心搜訪得譚煥歐陽珪許牧三人以其行聞爲一路殊選

黃庶分甯人嘉定中知南雄州訪民疾苦修復凌連二陂郡人利之

黃晟紹興間知南雄州敦尚教化初久旱晟至禱而有感雨三日歲大熟民苦賦役之重奏蠲之邦人爲立生祠

廖君玉字國華荊州人素好學知英州建書堂於桂山名曰紫桂堂偃仰其間時作吟詠而政事未嘗廢也遂於理學人多效之

岳飛字鵬舉相州湯陰人宣和四年真定宣撫劉韜募敢戰士飛應募遷秉義郎隸留守宗澤戰開德曹州皆有功澤大奇之康王卽位飛上書數千言以越職奪官歸詣河北招討使張所所待以國士尋補英州刺史破賊曹成衆十餘萬成奔連州飛進兵追之成走時虔吉盜連兵寇掠循梅廣惠諸郡帝專命飛平之飛至虔州固石洞賊彭友悉衆至飛麾兵擒之於馬上遂捕諸郡餘賊皆破嶺表平入見帝手書精忠岳

飛字製旗賜之

曹觀字仲賓修吉子也知封州時儂賊攻陷邕管行至封州人未嘗知兵士卒纔百人不任戰又無城隍可守或勸遁去觀正色曰吾守臣也有死而已後被執賊戒弗殺俸使拜觀不肯且詈曰人臣惟北面拜天子我豈從爾苟生耶賊知無降意害之妻劉避賊死於林峒事聞錄其子四人並追封焉楊允恭漢川綿竹人以直殿掌廣東市舶自漢之後海賊子孫相襲大者及數百人賊有葉氏者眾五百餘往來海上允恭集水軍造輕舸掩襲其酋斬之餘黨棄船走伏匿山谷允恭伐木開道悉殲焉

趙師旦字潛叔種之從子少涉書史尤刻意刑名之學用槓陰累遷甯海軍節度推官知江州斷治出己吏不能得一錢棄物道上人無敢取移知康州儂智高破邕州順流東下師旦止有兵三百開門迎戰矢盡與監押馬貴俱遇害

黃公度字師憲莆田人紹興中進士第一通判肇慶府攝南恩守治事之餘以讀書著文爲樂嘗題詩隆慶堂句云簿書休吏早花塢向人閑又增學廩擇秀民與之登降揖遜學者用勸邦人像而祠之

傅雱知南恩州文章政事迥出眾表民稱其賢特立五馬坊以榮之

陳豐字宜中興化人知南恩州政尚廉靜民歌曰君不見恩平陳守賢優游治郡如烹鮮遇旱禱雨自撰責祠云願俾微臣特減數年之壽令茲闔境普沾三日之霖

徐應龍字允叔建甯人第進士嘉定間知雷州又知南恩州爲

政寬和愛民如子民歌曰生我父母在何許養我父母徐州
主累官至刑部尚書

包拯字希仁廬州合肥人舉進士知建昌縣以父母老不就歸
養數年親繼亡調知天長縣徙知端州端土產硯前守緣貢
悉取數十倍以遺權貴拯命製者才足貢數歲滿不持一硯
歸尋拜監察御史立朝剛毅貴戚宦官爲之斂手人以包拯
笑比黃河清童稚婦女亦知其名呼曰包待制京師爲之語
曰關節不到有閻羅包老

郭祥正字功夫太平州當塗人母夢李白而生少有詩聲梅堯
臣方擅名一時見而歎曰天才如此真太白後身也舉進士
出知端州留心政術民樂其詩書之化尋棄去隱於縣青山
陳堯佐字希元其先河朔人高祖翔爲蜀令因家焉遂爲閬州

閬中人知開封府司錄參軍言事忤旨降通判潮州潮民張
氏子與其母濯於江爲鱈魚所食母弗能救堯佐聞而傷之
命吏操網往捕鱈至暴非網可得至是鱈弭耳受網作文示
諸市烹之人皆驚異

詹範字器之崇安人紹聖中知惠州蘇軾謫居範載酒縱遊相
與唱和時兵荒之後野多暴骨範取而掩之故軾詩曰江干
白骨已銜恩又嘗稱其治行類龔渤海

何庚春陵人知雷州東洋田舊無陂塘畝澮以資灌溉庚相地
鑿渠引水灌田民利之稱爲何公渠後戴之邵知雷州復築
堤捍海人稱爲戴公隄

危祐字夢弼南城人天禧中進士知邵州使者按治欲有所求
不從遂請歸百姓遮道留之尋遷太學博士以言詆宰相謫

廉州吏進聚珠扇歎曰爲廉州守而執此扇獨不愧州名乎
卻之

李時亮廣西博白人舉進士累官知廉州有治聲嘗獻平南十
策神宗嘉之善屬文尤長於詩與陶弼賡和號李陶集

齊唐字祖之會稽山陰人登天聖中進士第爲南雄州簽判交
趾進麒麟唐據史傳非之斥蠻人給中國眾服其博物

徐九思字公謹宗安人登進士以忤時相通判廣州神宗稱其
老成練事著有新豐集行世

沈造字次仲縉雲人政和中進士判潮時有韓山神歲須男女
以祭造至卽焚其廟毀像得巨蛇殺之凶祀遂絕議者以方

昌黎之驅鱷云

張夔字致堯海陽人通判廉州秋毫無犯山寇竊發諭使歸農

高宗書其名於屏曰南有張夔北有周昕

趙希呂通判雷州築隄浚湮大興水利紹何戴之績

蘇適字伯達眉州人文忠公軾之長子知仁化縣文章政事綽
有父風以政最遷雄州防禦推官祀名宦

何大正大庾人博通諸經元祐間入國學老師宿儒莫不推遜
時稱上庠三傑大正其一也官至南雄州司理參軍治獄察
情根於所學

鄭格字迪民福清人少穎悟博聞強記時號書厨中進士官廣

東觀察推官有清介之操所親規之曰子冰蘖凜然不知何
以爲出嶺計格曰既能入嶺豈不能出嶺卒家無餘財

林勳賀州人進士爲廣州教授獻本政書十三篇其說甚備後
累官至顯謨閣直學士

凌皓知保昌縣為民興利伐石堰水灌州田五千餘頃民德之
凌江之名以皓始

嚴顥字威卿吉水人舉進士為河源令持身以廉去官邑人餞
以海錯家人發缶得金亟停舟召餽者還之

周諤字希聖尤溪人登進士知新會縣王安石行新法郡縣風
靡諤不奉行民得免於青苗徵求之患一時稱為周夫子

吳懿德字夏卿處州慶元人舉進士知新會縣事無鉅細必親
決時新令至蠶戶有給由錢受訢牒有醋息錢一切罷去以
廉介辟通判廣州未拜卒卒之前一夕書於冊曰平生薄宦
甘受凍饑一介不取一毫不欺西山真德秀誌其墓甚稱重
之

李若水閩縣人知龍川縣以儒飾吏寬猛得中修泮宮築城池

一毫不以擾民民繪像祀於城東樓

米芾字元章淮南人工書善詩趣向高潔為浚泚尉二年職事
修舉教化興行

廣東考古輯要卷三十七

名宦三

元

高文鼎吉水人嘗參廣東元帥府事薩都刺薦於朝曰文兼六藝武冠三軍授廣州同知

王都中字元愈福建人官至廣東道宣慰使都元帥歷任四十餘年所至政輒暴著治郡之績雖古循吏無以尚之當世南人以政事之名聞天下而位登省憲者惟都中而已

烏古孫澤字潤南臨潢人其先女真烏古部因以為氏澤性剛毅讀書舉大略才幹過人世祖取江南以澤善謀擢知新化軍行總管府事民歌舞迎候於道曰是吾民復生之父母也澤至興學校及諸生講肄經義行鄉飲酒禮士皆嚮慕尋擢

海南廉訪使以雷州近海潮汐齧其東南陂塘而西北廣衍平表宜爲陂塘澤行視城陰日三溪徒走海而不以灌溉此史起所以薄西門豹也乃教民浚故湖築大堤塌三溪瀦之計得良田數千頃瀕海廣瀉並爲膏土民歌之曰瀉鹵爲田兮孫父之教渠之泱泱兮長我秔稻卒謚正憲

張謙趙州人元貞元年授廣東道肅政廉訪使發摘平反官吏畏之民有湯姓者富於財爲仇人誣告鍛鍊成獄謙爲平之因得釋其明斷類此爲政踰年杯水無所私卒於任

卜天璋字君璋洛陽人初授饒州總管以治行第一陞廣東廉訪使先是豪民瀕海堰專商舶以射利天璋發卒決去之嶺南地素無冰天璋至始有冰人謂政化所致

呂恕字仁卿河東人任廣東宣慰副使時寇盜嘯聚道殫相望

恕爲粥糜活饑者甚眾無何賊舟臨城闔出城扞禦賊見恕呼爲施粥相公戒無以矢石相向後卒於官廣人德之立碑鄉校稱爲古之遺愛

劉鶚字楚奇永豐人爲廣東副使守韶六年民賴以安後分兵討洞獠力盡被執自分必死乃書曰生爲元朝臣死爲元朝鬼忠節旣無慙清風自古不食而終嘗建浮雲道院以教鄉族弟子學者稱爲浮雲先生

馬合謨字端卿回回人至元中爲海北海南廉訪司副使嚴介廉明重農勸學夏旱祈禱誦雲漢之詩告祝懇至卽日大雨王英字邦傑益州人性剛果有膂力父子善使雙刀人號爲刀王至元中討賊邱太老於南雄擒其渠帥劉把東降之後漳州潮州賊起時英官海南道宣慰使以老致仕伯撒里謂僚

佐曰是非刀王行不可乃使迎致之英據鞍橫槊精神飛動賊平英功居多

許有壬字可用其先世居潁後徙湯陰幼潁悟讀書一目五行擢延祐中進士至治中累官監察御史行部廣東凡勢官豪民人畏之如虎狼者悉擒治以法部內肅然

范梈字亨父一字德機清江人家貧早孤母熊氏守志長而教之梈天姿穎異克自樹立無苟賤意年三十六之京師中丞董士選延之家塾以朝臣薦為翰林院編修官旋擢海南海北道廉訪司照磨所至興學教民雪理冤滯素稱嚴明年五十九卒吳澄以道學自任少許可嘗曰若亨父可謂特立獨行之士矣為文志其墓以東漢諸君子擬之

高芝濟南人知新州清節凜然一塵不染嘗於塵市驛路栽松

竹以便行者流風善政久而猶存

倉振真定人延祐中知新州時徭賊蠶起振入賊所諭以禍福示以恩信羣徭帖然向化暇日詣學召諸生講解經義又於驛路夾植榕松以便行者先是高芝守新州時行善政振實繼之故州人歌曰高松倉榕一道清風

謝必昌知肇慶事平饋輸均徭役歲饑則發廩賑給賴全活者以萬計遇旱則謁虔禱雨屢至有秋州人頌德不忘

方思廣廣信上饒人知連州增置學田創立義冢士民幽明賴之既去民為立政績祀於學宮

劉中孚字志行江西吉水人舉茂異至正中任韶州路推官用刑平恕囹圄常空時北山盜起通湖南紅巾寇為亂首目與大家徐姓有隙誣以反逆一門三十口俱繫獄中孚問得其

實即平反之後賊犯境長官納款逼其降中孚曰吾頭可斷竟莫能強旋除肇慶路總管以老病辭世稱梅南先生

楊大舉字子善益都人嘗為諸城新城二邑宰築福隆護田堤均賦役政通人和頌聲大作黎王瑛陳頴為作護田堤均賦役二記稱美之

黃昭字觀瀾撫州人由科目授新會縣尹德政化民廉潔自守因謁廉訪司書吏以畫漁索題援筆書之結云從來不食鈎頭餌縱有絲綸柰若何吏銜之後為尙書

明

周楨字文典江寧人洪武初為治書侍御史及建廣東行中書省除參知政事凡州縣有政績者皆上於朝會下詔開科楨豫聘名儒以待考試後拜刑部尙書

王翱字九臬鹽山人永樂中進士景泰初南蠻寇兩廣以翱總督兩廣軍務先是翱定四川松潘之亂威望大著比至嶺南諸蠻聞翱來大懼翱推誠撫諭寇盜止息故兩廣得免騷之患

韓雍字永熙長洲人舉進士景泰中為廣東副使贊理兩廣軍務先是編修邱濬上書大學士李賢言賊在廣東者宜驅在廣西者宜困賢善之召示諸將主其說雍曰賊已蔓延數千里而所至與戰是自敝也當全師直搗大藤峽諸路首尾相應攻其腹心巢穴既傾餘逆及解耳眾曰善後諸賊流劫至廣東應時破殄遷左副都御史提督兩廣軍務致仕卒謚襄毅廣人念雍功為祠祀焉

吳琛字輿璧繁昌人舉進士官兩廣總督時嶺南寇盜充斥琛

曉以禍福無不俯伏聽命識者謂廣寇冥頑可以威懼不可以理論以理論之而革心向化如此者前此未見也

朱英字時傑桂陽人正統中進士累官兩廣總督自韓雍大征以來將帥喜邀功利俘掠名爲鵬勦英至鎮以清靜約飭將士毋得張賊聲勢在兩廣積儲至四十萬帝嘉之

唐珣字廷貴華亭人舉進士總督兩廣人咸畏憚其風裁

劉大夏字時雍華容人舉進士改庶吉士累官廣東布政使總制兩廣軍務廣人聞其至莫不稱慶陳獻章以道學名一世少許可獨與大夏善稱之曰劉公愛民如子守身如女無論於今人中卽求之古人亦未易得也

潘蕃初姓鍾字廷芳嘉興崇德人累官兩廣總督領外鎮撫以故威重自韓雍開府後蒞其地者率建牙吹角列戟擁燹被

組練而夾甲帳者幾萬人蕃至量留數人僅給麾下使令陞尙書歸無宅稅他人宅居而隘每與鄉人飲必露坐花下時有詩曰尙書歸來無第宅稅地種花兼種魚舉網打魚魚換酒花前醉倒老尙書後爲中官瑾所害下獄論死尋戍甘肅瑾誅詔復官歸里

陳金字汝礪德安應城人繇進士知婺源縣以最累遷至總督兩廣有局幹喜建立復鹽利開鐵冶政聲大起

楊旦字晉叔福建建安人舉進士授吏部郎中以剛直聞累官至總督兩廣軍務計平滴水巖帽子峰等犷獍壘書褒之後被誣致仕

王守仁字伯安餘姚人登宏治中進士巡撫南贛時南中盜賊蜂起謝志山據橫水左溪桶岡池仲容據泃頭皆稱王與大

廣陳曰能樂昌高快馬柳州龔福全等攻剽府縣而福建大帽山賊詹師富等又起前巡撫文森託疾避去守仁至檄福建廣東會兵討之擒師富及曰能歸乘勝進破橫水左溪桶岡志山敗降時湖廣巡撫秦金亦破福全乃設崇義縣於橫水以控諸猺還至贛州議討泃頭仲容遂遣弟仲安來歸而嚴爲戰備會歲首大張燈樂守仁留令仲容觀燈伏田於門擒之自將抵賊巢連破上中下三泃乃於下泃立和平縣置戍而歸餘賊悉平境內大定嘉靖中思恩田州土酋盧蘇王受反總督姚鎮不能定乃詔守仁以原官總督兩廣兼巡撫討降之又攻克斷藤峽仙臺花相諸峒猺盡平其寨

張岳字維喬惠安人究心理學舉進士與陳琛林希元三人同志知廉州府稱賢能第一與副使翁萬達議平安南尚書毛

伯溫語人曰吾於斯行得兩巡撫才岳宜南萬達宜北後岳提督兩廣軍務時論其勳賢與韓雍劉大夏相頡頏

王鈞字子宣會稽人嘉靖中進士累官總督兩廣軍務時四履之地皆爲盜窟若肇慶府扶黎寨海山羅山諸處尤雄鷲鈞乃發偏師擒其魁李汝端馬天恩已而倭寇自閩入揭陽勢張甚而長樂龍川程鄉諸處及羅絲洞賊復相煽動鈞會兵次第擒斬奏上有白金文綺之賜後進南京工部尚書卒諡恭簡

譚綸字子里江西宜黃人第進士總督兩廣首討七山諸寨扼險守要以制諸猺始終以兵事著勳首功不啻萬餘皆身履行間得之

吳桂芳別號自湖更號潭石新建人嘉靖中進士累官至總督

廣東通志卷三十一
六
兩廣抵任未數月海寇頻至桂芳選練兵將皆中機宜先後克獲餘寇遁海爲雷風所覆無一還者地方安謐人以爲神天子凡六致賞焉

吳文華字子彬連江人嘉靖中進士總督兩廣軍務巡撫廣東時李珍江月照久拒命文華討平之珠池之役無賴子弟聚至數萬勢張甚文華第移鎮廣州命將陳師海上以懾之下令有司諭其父兄自令解散在鎮三年廉潔嚴重文武將吏無敢載金帛至者擢去民思之祠於學宮左

蕭彥涇縣人隆慶中進士總制兩廣軍務日本躡朝鮮會暹羅入貢其使請勤王尙書石星因令發兵搗日本彥言暹羅處極西去日本萬里安能飛越大海請罷其議星不從既而暹羅兵卒不出弟雍廣東按察使宦績亞於彥而學過之時稱

二蕭

張鏡心字湛虛磁州人登進士總督兩廣生擒盤古峒猺蕩掃賊氛連州寇發駐節乳源命將搗其巢猴寨蝦塘塘頭諸醜類悉殄滅功鐫兩粵碑有平蠻紀事行世

楊信民浙江新昌人正統初爲廣東左參議清操絕俗以事被逮軍民詣闕乞留于謙薦之命守備白羊口會廣東賊黃蕭養圖廣州急嶺南人乞信民乃使巡撫其地士民間而相慶日楊公來矣時廣州圍久禁民出入樵採民益愁苦歸賊信民至開城門發倉廩刻木鍍給民得出入賊見木鍍曰此楊公所給也不敢傷信民益厲甲兵多方招撫降者日至乃使使持檄入賊營諭以恩信蕭養曰得楊公一言死不恨遂單車詣之隔濠與語賊黨望見曰果楊公也爭羅拜有泣下者

蕭養且降而總督董興大軍至賊忽中變夜有大星隕城外七日而信民暴疾卒軍民聚哭皆縞素賊聞之亦泣曰楊公死吾屬無歸路矣訃聞賜葬祭錄其子玖爲國子生諡恭惠李叔正初名宗頤靖安人洪武時奉命巡嶺表瓊州府吏訐其守叔正鞠之守得白抵吏罪太祖嘉之曰人言老御史懦乃明斷如斯耶

程富字好禮歙縣人以監察御史巡廣東其地阻隔山海富不避嵐障躬歷蠻區視民利病使院舊有荔枝百樹門夫養畜以備使需富曰是設餌也斧其樹散其畜土豪爲民害者悉去之不畏權力威聲赫然

劉纓字與清新淦人成化中進士奉命按廣東廣南濱海有別渚日奧番舶交易之地也地有珠市世其業者千人豪民張

政先竄名番舶商海外致番貨直數十萬緡結中人之監舶者假以公牒得捕盜海上因欲吞十人者之業誣指爲盜瘐死獄中者七人餘三人當論決纓讞得其情釋三人抵政死值鄉試爲監臨官閱落卷得一士以爲奇列之首選榜出咸謂得人卽湛若水也後遷刑部尙書卒

熊蘭字天秀南昌人舉進士按廣東所至旌廉黜貪剛介莫犯後坐讒落職行橐蕭然卒於家廣人過南昌者莫不往弔

周煦字啟和吉水人舉進士按廣東掌院汪誠齋曰吾送福星入廣也時海盜方息軍餉日耗煦至釐舊弊裁革殆盡七年風節如一日卒於官

潘季馴烏程人舉進士巡按廣東行均平里甲法廣人大便代去疏請飭後至者守其法從之

孫永思字性孝蒲州人嘉靖中進士巡按廣東性莊重寡言笑時仕者多漁獵其民永思按三尺法率屬以廉諸司憚之比之包孝肅

彭韶字鳳儀莆田人登進士累官至廣東左布政下車首集父老問民疾苦利病即興革之所至有聲如去五顯廟以祀崔清獻公撤土神祠以祀汪參政廣洋之類期望受民詞至千百紙決斷如流告誡諄切民感愛若父兄後以言事忤旨調貴州布政瀕行父老涕泣有追送數百里外者朱英贈詩有獨有羊城臨發處西風卧轍烏聲酸之句

羅榮福建古田人進士廣東左右布政使正德中入覲言鎮守內臣入貢之害其取諸民者盡錙銖而貢不及什之一又言廣東所在伏莽不窮治之事叵測皆不報其後滴水巖帽子

峰獐猿負固龍川和平等縣盜賊竊發人皆服榮先見之明梁材南京金吾右衛人宏治中進士歷官廣東左右布政時天下布政使廉名最著者姚鏌與材二人而已

徐問武進人宏治中進士累遷廣東左布政使立已方嚴有大臣風度粵裝一無所攜曰不使吳隱之專美也粵中稱賢藩惟問與彭韶而已

胡松字茂卿徽之積谿人正德中進士歷官監察御史以言事忤旨下遷廉州府推官有守璫據民荔枝園者松奪而還之民璫戒曰是強項推官當謹避之耳進廣東右布政使屬歲禮以松筴全活老弱萬計

柳英字子鍾巫山人嘉靖中擢廣東布政使入境行李蕭然惟一蒼頭自隨數月與時抵牾即拂衣去粵中稱廉介必曰柳

布政

萬士和字思節宜興人嘉靖中進士官廣東左布政使粵民萬里轉輸京帑其費不資士和著令稍徵轉輸費屬計吏並領之粵中稱便已晉應天府尹屬直指使初按粵逆辭之境上遂行直指以爲倨銜之欲巧詆以法抵粵悉取諸錢穀籍積士和失無所得則榜掠筦擢吏屬誣引士和吏忍死不服曰有之萬公不應飲粵一勺水耳直指愈怒捃摭益亟香山黃佐家居養高不可致忽出謁直指直指喜獨能得佐也自起迎之佐入揖曰老夫跡不至公府久矣今爲萬公來公卽欲涇之其人非可縑者直指心忤不敢出一語事乃寢士和性廉儉凡粵中丹砂香珠之屬一無所取官終禮部尙書劉采字汝賢麻城人嘉靖中進士官廣東左布政使約已裕民

守官肅度所至以廉能稱嘗以家學春秋宗旨授諸生於是廣士始有麻城之學而王佐輩相繼登第後遷兵部尙書卒諡端簡

陳性學字還冲諸暨人萬歷進士授廣東屯鹽僉事念粵處海濱鹽爲利府而狡獪所伏亦爲弊叢於是條廣西官運六議又條吉安鹽議悉中窳要粵商德之復攝督學纂編搜嶺南人文之勝未幾遷官去尋復授廣東左布政使內璫李鳳等咸敬憚之粵民愛戴如慈父母

汪起鳳字來虞吳縣人登進士累官廣東左布政使時值歲荒闔郡饑民沟沟起鳳下車卽爲調劑首率諸司捐賑人心遂安存活無算海寇劉香老作亂用兵惠潮前後轉餉不匱賊平論功居首在任六載以不附魏忠賢奪職崇正初起用卒

於官

徐奇字以正浦城人永樂中擢廣東右布政使以進香至京載
嶺南土物將遺諸臣有得奇單目以進上召大學士楊士奇
問之對曰此非重貨答昔日贈行詩文耳上即命燬之一無
所問

周鐸字秉器萬安人舉進士歷官右布政使與韓雍征海寇有
功時使司庫有楮木柱數十破之皆黃白金而籍無載者僚
屬欲均利之鐸曰財屬庫藏可得而私耶悉聞之兩院時嘉
其廉介稱方岳政績第一致仕歸清風肅然

戴弁字士章浮梁人累官廣東參政時黃蕭養作亂弁往撫安
猝與賊遇於孺羊峽口弁艤舟登岸據胡床坐諭之曰我戴
參政也朝廷因爾輩失所命我來撫爾輩聽吾言革故自新

即吾良民何乃為喪家計耶賊酋環視曰果我公也麾眾羅
拜曰公與楊公皆愛吾民者遂密護弁歸未久寇大肆弁斬
蕭養於城南餘賊悉平

黃容字伯望莆田人起進士出為肇慶府治尚廉平抑豪右行
平糶免蕉布官市之擾溝黃祠圩橋之水使不害稼號黃公
溝後擢左參政

王國楨浙之山陰人舉進士授行人歷都諫毅然以經世為已
任劾本兵大臣徇私廢法直聲動天下時嚴嵩煽權諸所論
列侃侃與嵩左於是出為廣東參政分守嶺西與督府談愷
議征大羅山寇直搗其穴民賴安輯頌聲載道肇人立祠於
綏水祀之

顧夢圭字武祥崑山人擢廣東布政司參議海北有平江青鶯

楊梅樂民四珠池詔書督採甚急因上疏言海面珠池先朝率十五六年或十年一採始得美珠適者三年再採珠已耗竭蓋蚌珠之生息甚難採愈數得珠愈少乞勅停罷養寶源以寬民力疏入朝宰見之日奈何爲此驚人事耶下部寢不奏

陶魯字自強鬱林人以廕授新會丞時香山順德間土寇蜂起新會無賴子弟羣聚應之魯召父老令率子弟輩築堡砦繕甲兵練技勇以孤城捍賊城守大固賊來犯輒破之賊讐之次骨劫其鬱林故居戕其族黨發其先塋魯聞之大慟詔徙籍廣東課最累遷至湖廣按察使兼廣東按察副使領嶺西道事人稱之爲三廣公歷官四十五年始終不離兵事大小數十戰廣人倚之如長城

孔鏞字昭文長洲人景泰中進士任連山時邑爲流寇所據鏞至依州而居招撫流散賑以官廩天順中大軍征諸蠻峒鏞率義兵爲鄉導首破賊巢始復縣境遂遷縣於雞籠山城而守焉尋創公署學校及壇祠舖舍規制大備以功擢知連州旋陞高州知府連人如失父母先是高涼爲西寇侵擾土寇乘機蜂起鏞躬擐甲胄跋履山川前後禽斬境內綏輯尋陞廣東按察副使仍守其地嘗單騎入賊壘慰諭許令自新皆感泣願降於是剽盜梁定侯等並受招撫蒞高四年囹圄空虛以憂去軍民泣送有出千里外者

陳欽字諒之世家清溪成化進士拜武選主事得補南署出刺廣平政教一新嶺南爲獻雄省典學校者難其人遂拔欽於郡守中故典所無也之官卓然以興道爲己任端範淑人綽

有洙泗遺風

陳祥字應和高安人舉進士累官至廣東按察司副使廉公有威人稱神明時通判萬應選福安人在任廉正與同知楊薰號為三清

胡訓字誨之南昌人宏治中進士擢廣東按察司副使飭兵於瓊瓊去廣城三千餘里且迫近諸蠻洞有活羅者尤兇黠訓議剿之以警眾選調官軍往不半日賊面縛降認糧入籍於是生熟黎人樂歸者眾州縣村洞入戶版者以千百計實海南百年來所未有又兼督學政訓士以行檢為先文尚理致而下詞藻瓊人至今慕之有遺愛碑

王大用字時行興化人舉進士擢廣東按察司僉事兵備清遠其地積為盜區患且百年大用簡士卒嚴賞罰遂破其巢又

移師攻黃藤峽黃葉洞後山十八山諸處殲賊唐鎮山楊旺等新會泉諸洞依山負險大用密授方略破之順德增城香山沿海諸村晝農夜寇蹟殊詭大用設法覺察獲真盜兵備五載征剿無虛日所向有功後官至南京刑部侍郎

魏校字子山崑山人宏治中進士正德末為廣東提學副使教士以德行為先不事考較文藝輒行黜陟首禁火葬令民興孝乃大毀寺觀淫祠或改公署及書院餘盡建社學教童生雖以經書然三時分肄歌詩雜禮演樂風俗為之不變其崇正闢邪之功前此未有也任用廣郡庠生陳激衷從化庠生林克中教諸生靜坐不許讀書謂之坐齋著體仁說令學者內省氣象自中達外如春風之和乃見仁體每晨入見稽其所得後以憂去學者稱莊渠先生卒諡恭簡

江潮字宗之貴溪人舉進士歷官廣東提學副使以道自重以禮授徒蔚有知人之鑑歲考時謂霍韜梁焯金山必連第且謂韜有魁元才然寘山於二等責曰汝本有才何杜撰呂申公格言以相欺乎後日事君還當敬慎後山以戶部主事監兌江西陷宸濠黨中果符潮戒慎之語士林稱服又謂霍韜可作榜元及考潮州還亟煥韜語曰今科解元當是蕭與成汝次之然汝當連魁天下功名事業大出蕭之上後果如言人稱神鑒

歐陽鐸字崇道泰和人舉進士擢廣東按察副使提督學政至則惇禮崇讓以行檢先諸生士習文風爲之不變會鄉舉鐸預擬魁五經者曰吾得其四矣謂瓊士唐穆潮士陳思謹鄭宏彝李曰森也詩魁非廣庠岑萬則曾貫又謂連士張叔庠

廉士王養民當俟後舉張稍進可名在二十五前後皆如言
廣人神其藻鑑

方良節字介卿莆田人進士知惠州時巨璫擅威索賄良節屹不爲動築拱北南隱榕了三堤扞西湖水浚池鰲石鎮湖之流又大修學舍人士嚮風後擢按察副使

顧可久字興新無錫人備兵瓊海按行諸部周咨黎倭出入之處繪圖爲說瞭如指掌未幾羅活崙黎出劫爲盜遂按圖窮治之儋崖諸黎五十二部落聞風欵附境內帖然前此未有也

王世芳蘇州人正德進士任廣東提學副使學問淵源鑒識宏朗考校諸生謂魁元多出潮州後林大欽中解胡一化中狀元皆潮人時服其精鑒

鄒守愚字君哲福建莆田人舉進士出守廣州有庖人烹雞雜以茄羹黑色御史以為毒已坐以重辟守愚疑之令人如所具烹焉亦黑力爭御史前釋之新會民激於徵逋聚海艘為變監司招之不應曰必鄒使君來也守愚單騎往民望見輒涕泣解散其威信服人如此後官至戶部侍郎卒諡襄惠

胡永成字思貞吉之安福人嘉靖進士出知南雄擢廣東按察副使南雄當江嶺襟喉天順間設太平橋權稅郡司其管多所沒入前守劉實獨以節介名時號鐵板永成至歎曰吾縱不能為劉鐵板將不得為木板乎既以權委他倖李易一人以防蠹漁會議開小明路永成建六難之說初庾嶺未開時商舟道入東河抵烏逕出信豐而射利者欲從西河入南安小明永成難之曰塞烏逕路廢小民業難一西河在下流移

橋關費鉅難二減鹽牙稅勢須增民料價難三新道險僻必多增巡徼難四開道撤江嶺藩籬難五西河淺小水利不便難六議者辭訕事竟寢

楊載鳴字虛卿泰和人正德進士補潮州府推官廣東吏故有貼班銀日助衙錢載鳴至首罷免有鄉宦自閩寄香茶不啟封還之饋遺請託一時盡絕至刑名出入未嘗不規規焉措意也擢廣東督學副使毅然以復古道正士風為任廣大夫謂自魏校歐陽鐸而後蓋僅覩云

任可容字養宏萬厯進士累官至廣東按察副使兵備惠潮下車之日建尊經閣養賢堂教育士子時倭犯碣石募勇陳聰等擊破之會諸司俱缺兼轄五篆積勞成疾卒於官

楊渙字德濟泰和人進士知四會縣邑有斷腸草貧民有爭輒

服此圖賴人多被其害後至出令民有事陳訴者納草百根方與受理積而焚之種遂絕訟亦止後陞按察使僉事

吳中字時中樂平人進士任東莞令東莞賊起都御使韓雍檄中禽捕旬日渠魁斯得雍喜其能留中巡視海道守增江口控扼盜賊中至卽編戶爲甲各漁其海遇賊舟則尾至其地賊以其漁不忌也旣得其實卽遣人捕之不閱月賊屏息改中知廣州府

朱伯驥字千里通山人任廣州推官儉於自奉破衣蔬食人皆謂其苦於束縛伯驥安之若素嘗謂僚吏曰居官不儉則用必匱匱則謀所以補遂漸恣肆至不可復問官之守廉必從儉始某所爲斤斤自守也

朱欽相字懋中江西臨川人舉進士補南海令諸務悉經手裁

不假吏書文書堆案一覽悉記隨舉一事叩之無不詳其顛末者曾經犯事之人雖更姓名見卽識之曰若乃某也再犯矣性賦明敏人莫能欺執法不避權貴發奸摘伏人號神君倪尙忠字世卿浦江人萬歷進士授順德令居官清白於時順德稱下邑科第寂寥尙忠日進士子課藝文取其尤者拔之嗣後春秋二榜登第不絕人比之文翁云

黃正色字士尙號斗南舉進士令南海百務叢沓正色蒞之閱月而積案盡清晝間無事輒鼓琴自娛

蔡惟溥泉州晉江人進士知香山縣性純篤喜怒不形邑有三虎爲患率民捕之虎患悉除閭里以安

林憲曾莆田人知龍門縣廉明多惠政善斷疑獄一縣稱其神明曹無留事百姓以囹圄生草庭可張羅況之

蔡善繼字五岳湖州人進士知香山嘗端坐堂皇若不營一事而堂上下肅然發摘若神好訟者相戒匿影甫蒞任卽條上制澳十議未幾澳弁以法繩番目致叫囂叵測善繼縛至堂下笞之故事番人無受笞者獨善繼廉介素爲番人所服故遂弭耳受笞而去

林會春字景仁惠安人知新會縣性剛毅智略過人發摘如神兩臺交薦之以治行第一賜宴禮部

曹學參字唯齋全州人官新會考最爲天下第一弟學蘇知瓊州子正經和平知縣皆廉能清白時謂曹氏一家咸造福於粵云

張璧鄞縣人知清遠邑人有爲虎傷者屢捕不能得璧爲文檄城隍旬日而虎得眾以爲至德所感

張欽字敬之南昌人以訓導擢清遠知縣至卽罷絕饋遺剔求蠹弊是時程鄉盜起眾數萬大兵徂征俘獲日至而盜不衰都御史林廷選議非得良令相宜撫誅兵且未已乃奏易欽程鄉欽之程鄉卽請督府罷兵從吏士數輩抵賊壘開諭禍福賊眾心動伏拜曰願如教赴日夷堡壞障籍其丁壯老幼婦女四千人散遣之林得報謂諸司曰與師十萬不如易張令一符

蘇廷龍莆田人知清遠邑素苦虎患出傷人眾捕之不得廷龍設檻捕之一日得四虎呪之曰殺人者死律有明條四虎中曾噬人者當俯首伏罪其一低頭帖耳狀如懼服餘者嗚吼不已遂召逐虎者視之其匍伏者果傷人之畜磔之而釋其餘眾競謂久捕不得得而縱之後患莫已廷龍曰無傷也三

虎果渡河遠徙人以為德政所感

廖輔字舜元福建汀州人知連州地多竊盜輔曰急則治標緩則治本治本以日治標以夜夜行者不得逾一更乃選役分布各村鎮邏察之獲賊者受上賞日則令里長編戶口形跡詭異者不許為之主三月而道不拾遺

曹錦字會周長洲人進士知連州以州志久缺徧訪士夫家得宋本及明成化本合修之以仙釋惑世誣民害道特刪不錄徐美字忠甫郡武人知連州一夕微行有二婦張燈謂曰清哉油如吾徐使君矣明且召訊之曰爾夜言吾清安所據婦曰口碑載道豈獨紡績間篝燈私語耶

侯禮字立之臨桂人洪武舉人知連州會獠獍貌阿孫及獠蠻廖廣秀等劫掠鄉村禮諭以禍福悉招徠之九載考績民詣

闕請留復任九載

殷貴字南金號惺齋無錫人知陽山縣始至即為民講律令俾知趨避又大書為善最樂四字印給之凡死囚必求生道不得已焚香告天而後成獄獄中置一響板約曰寃未達者擊之數月間恩信旁達遠近胥嚮

劉信鳳陽人成化末知乳源為人謹篤政簡刑清事母董氏至孝母嗜瓜會大旱瓜多華不實信虔禱於天瓜一株結九十九子闔邑異之

葉景龍麗水人洪武初知南雄府見城西河塘村地乾旱豐力維艱乃倩工築陂引凌江水溉田民受其惠號曰葉公陂黃瑜字仲美臨桂人為肇慶知府剔蠹剗弊化所屬諸蠻御史韓雍嘉其治行奏請加秩

張吉字克修號翼齋餘干人成化進士轉肇慶同知知肇慶當
蒼梧下流頻年苦潦相其地日是可以隄經營勞瘁歷三載
而後成隄互三縣復爲寶以殺衝決之勢民號寶曰張公寶
隄曰翼齋隄

梁潛字用之泰和人知四會縣推誠愛民暇輒就學舍授業諸
生歲餘民服訟息縣有龍橋河世傳吏有廉平之政卽清自
潛來訖去河水澄潔可鑑

徐均爲陽春主簿陽春故春州也瘴癘巖區每使者當按行輒
避去由是縣豪得雄據爲姦均至吏白應往視莫大老叱曰
何物大老復曰是洞主也老且病家居宜就見叱曰若化外
抑民伍也趣令來見不然且屠戮大老聞而懼乘板輿至叱
使下拜不得已蒲伏熟視諭遣之俟其語有異捕繫之獄均

曰彼眾必來劫因備之已而二子果將其眾來聞之皆懼莫
敢前詰朝昇兩大瓜安石榴十數枝致饋皆黃金大珠也均
不一視卽麾出械繫親送詣府後府官竟受賕脫大老

呂大川字中源新昌人成化進士守惠州才識精敏剖決如流
郡有淫祠鄉愚謂其能爲禍福昇土偶爭相羅拜大川命沈
之江後征劇賊張權隨軍督餉察諸俘之脅從者釋之南海
張詡曰呂惠州之政霜雪內有陽和戒馬中行俎豆者也
吳稷字舜弼江南華亭人進士知惠州始至署郡篆裁冗稅革
濫役置規過櫃於門立保甲以誦盜中丞聶榮襄公稱之下
其法於諸郡

何阿魯山東人洪武中歸善縣主簿以寬恕爲政仁及窮民合
境呼爲何母

張鏘惠安人萬厯中進士任海豐值歲大饑單車發賑不足至
鎔帶金以繼之卒於官民爲出涕

夏則中武昌人洪武中知興甯縣值寇周三之亂民死徙殆盡
其子遺者又以官兵壓境將罹昆剛之焚則中率鄉老懇於
總兵始免橫酷初則中招携流亡欲集矣病官田重稅莫肯
承籍則中請以官田減同民產定賦從之遂以安業民感切
骨久而不忘父老相傳則中請減稅於朝犯天威寘之極刑
至今道其事者莫不感歎

祝允明字希哲長洲人宏治五年舉於鄉授新甯知縣捕戮盜
魁三十餘邑以無警

劉揆字廷榮宣城人嘉靖中知和平縣和平新造之邦揆至始
創立公署建月城招徠居民以實閭井立學社擇民間子弟

教之以風頑梗民爲立生祠

王源字啟澤龍巖人永樂中進士授庶吉士知潮州府築城東
廣濟橋鑿西湖山大石怪又刻藍田呂氏鄉約令民講肄陳
白沙謂吏於潮者多矣其有功而民思之唐莫若韓愈本朝
莫若王源

郭子章廬陵人進士知潮州有才名著潮中雜記補前志所未
備學者稱爲青螺先生

龐承寵吳江人進士任潮州同知有介節後黃中澹廣昌人亦
任同知廉靜愛民時有前龐後黃邦人安康之頌

楊薰字太和南昌人進士任潮州通判遷惠州同知苦節自勵
惡衣糲食晏如也時與知府陳祥通判萬某號爲三清

鄭懋中名薛以字行晉江人洪武中領應天鄉薦知程鄉縣寬

恕廉慎治先禮義自奉淡薄無所取於民程鄉人鮮知學懋中至首作新學校親為生徒講解自是始有進士登第者爭訟者至庭輒以禮委曲諭之或未悟令退而思之卒感服不施鞭朴詞訟以簡縣中稱治謠曰鄭懋中真長者禁令不煩徭役寡斯民相見何嬉嬉昔日無羊今有馬

孔鏞字韶文長洲人進士知連山擢高州府時賊屯境內者十餘部而其魁馮曉屯化州鄧公長屯茅峒屢招不就鏞一日單騎從二人直抵茅峒公長聞新守至呼黨擐甲迎之及見鏞坦易無騶從氣大沮鏞下馬入坐中庭諭以禍福遂率眾來降曉亦次第納款

戴嘉猷績溪人進士知高川同知署雷州剷除宿弊豪猾斂跡郡事清簡時久旱嘉猷齋心禱雨立應民苦饑即請賑貸之

任逾八月四境安謐

李渭字湜之吉水人弱冠登賢書遷高州同知擢韶州府先是韶有二源之役百姓苦之多去為盜渭集寮屬諭曰夫子告康子以不欲弭盜之本也倘身為谿壑是我為盜竽何以責民乎弭山中盜易弭心中盜難諸君勉之治最入覲時穆廟宴天下守令卓異者七人渭與焉

黃敬天台人知雷州府先是府多囚繫敬悉為剖決囹圄空虛輿人誦曰黃公來遲使民無依公來蒞政惠我無私

黃瑜南城人景泰中由舉人任四會知縣憂去服除起知開建邑常被寇瑜植木柵以守親弓矢以禦寇盡心撫字民皆思之成化中陞雷州知府按明代粵中宦績可稱者有三黃瑜一南城人景泰間知四會縣陞雷州府此即其人也一臨桂人天順中任肇慶府知府見前一香山人成化中知長樂縣以其舉人不著錄三皆同時

王秉良字伯存西充人進士正德間知雷州時守珠池中貴趙蘭氣焰方熾秉良獨與之抗民恃以爲安蘭因構誣以私逮京下獄嘉靖初御史陳實疏革守珠池內官秉良始白

楊表字汝中龍溪人進士嘉靖中知雷州府事有清操時初革珠池內官習弊猶未除表悉爲捐貸之百姓歡呼於道遷去民以珠餉表謝之曰地之產珠以太守廉也太守愛寶則爾輩不有其珠矣峻卻之

陸贊龍游人進士嘉靖中知雷州勵苦節在官三載不攜家屬歸途行李蕭然郡北十五里有泉清冽人以此之立碑其側號陸公泉

陳九仞漳州人進士知雷州府事嚴禁珠池船以其不便民而爲游匪所備宗也卒以此忤權閹改調去

葉修南昌人由進士知雷州舊例參官有公堂銀修下車首革之禁三縣役人不得下鄉各社均派最爲民害一切革絕令郡鼓舞

伍堦清流人任雷州郡守清慎自持其子以銀三兩買帛一疋堦曰一衣三兩中民一年之食也令還之

劉彬字素彬永豐人第進士授潮州程鄉知縣縣俗文繁彬董士林務篤實諭閭閻以勤樸民遂有唐魏風部民王慎者德彬直其枉置黃金茶中爲報彬卻之曰生汝者父母之心豈容報乎九年考績方伯劉大夏署云無能事之虛名有牧民之實惠尋陞雷州府同知拓學校雪冤抑以疾解去爲之謠曰知府似爛坭通判似豆腐去了劉同知倒了雷州府

孟雷字孔敬澤州人登進士任雷州府明敏卓犖剖決如流尤

喜作青髻士延名師教於學以雷士登第者鮮乃徵舊識建於湖心扁曰興眾又立石碑亭刻狀元生三字以兆後進其後人才鵲起雷之功也

高維嶽宣城舉人萬厯中授雷州府推官廉明有執署府事革各吏私獻清釐庫弊濬復河渠灌洋田萬頃直指李應魁深器重特薦其材欲超用之竟循資得鞏昌同知去

歐陽保新建舉人任雷州司理庭無冤獄人稱神明以雷郡平陽無秀氣特相南門外巽方鳩材建塔以助形勢雷土自此有發甲者

劉烜安仁人進士知廉州府毀淫祠興水利羅城江土沃地廣開渠引水灌田百餘頃招流民環居之合浦戶糧增益自此添編興忠一里興忠之民至今蒙其樂利飲食必祭焉

徐柏字守卿浦城人進士出守廉州初至官時一老奴肩行李

一短童攜塵扇隨之迎者麇集郵亭不知其爲守也去之日襆被外無餘物謝於眾曰吾向者固一肩來也眾謂數十年守此土者能與地名稱惟柏而已

張其孝滋陽舉人爲廉州知府公正無私時珠多徙其孝一意以慈儉化民去珠復還人以爲清廉之應

楊百朋建安人進士合浦寬大不苛喜談文藝士子多蒙指授時值內官開採供億殷煩百朋善調停民以不病

徐珪字良璧開化人以會試乙榜授欽州牧欽民以漁爲業前此賦繁而魚徙珪反其政魚復還民建還魚亭以誌之

方向桐城人進士正德中知瓊州歲旱徒行數十里禱雨輒應珠池太監韋眷橫索民間向禁不與眷亦少戢入覲時僕私

市一珠索而投諸海

吳俸會稽人瓊州通判萬厯中添設撫黎通判以俸領之俸承
剿定之後開示恩信招撫黎人黎出聽招者數十崗時建設
水會所社學取府學弟子員教黎童習讀黎遂知學

吳邦俊臨桂人知瓊山居官廉潔民有實金於甕以獻書其覆
曰蠅醯邦俊覺而卻之

趙謙字撫謙餘姚人博洽經史時稱考古先生洪武中搜訪遺
賢吏部郎侯庸薦之學士解縉謂與其班於朝廷之上孰若
施教化於蠻夷萬里之遠遂領教瓊山縉爲文送之有曰教
官聖人之木鐸也吾當賀聖人於南海之濱又增一木鐸矣
其爲時所推重於此謙既至作瓊臺布學範造就士類雖將
門子弟及蠻夷荷戈執戟者咸烝烝向風從之游者多爲名

世大儒卒於官咸謂南海士子得聞聖學實自謙始

陸親仁蘭溪人嘉靖間任文昌主簿自奉儉約歸裝不名一錢
苞苴至者峻卻之僉曰官尉簿耳何苦乃爾親仁曰貪廉二
字不以官大小分也豈小官獨不可自樹立耶卒無所受
陸昇字彥昇靈川人洪武舉人永樂間知臨高時久旱焚香祝
天夜夢老嫗訴冤厥明獲詐稱牙兵者至詰之永甯鄉符儂
也因得其殺伯母狀寘之獄天大雨解學士縉過臨高爲題
雪冤致雨卷及吟松詩贈之

彭希顏莆田人嘉靖間知昌化縣愷悌樂易政平事簡嘗曰民
間有要害事具牘而後報奸宄聞風佚矣置鼓於門使控事
者鳴之鼓聞卽出坐堂剖決是非須臾立斷嘗有樵人入山
其子殺人比暮歸案已具申解就道矣其治事敏速如此

李紹賢清江人隆慶中知萬州居官廉靜斷獄多所平反海瑞贈言曰爲官不入民怨之錢不以民怨之錢養其親則子和於牧民之堂母和於清江之源瑞不肯許人者其爲所稱如此

徐琦字廷振正統舉人授崖州知州崖民多黎戴竹笠子垂髻來見琦喻以服色當從中國爲易方巾直領之製簡率俊秀使趨於學教以婚喪禮在崖九年俗爲之變

朱宏字海若臨桂人萬曆舉人授橫州學正教人以孝弟爲先遷吳川知縣時海寇爲亂躬自禦戎巡按贈詩有墨綬書生也佩刀之句後知崖州歲大祲征賦不及額上官責之宏上奏記曰降黜是甘不忍令愚民剜肉竭髓也土民德之

馬夢箕號南奎潯甸人萬曆中以舉人知羅定州搜奸剔蠹造

士愛民吏不敢欺民無冤抑聽斷如流稱霹靂手取受不苟有卻硯風

包爾庚號長明江南上淮人工文詞舉進士有名崇正中知羅定州其清如水嘗曰我家孝肅卽吾師也民有訟令佐證約會限期審鞫不遺隸役其徵收之法週年分爲十二卯人戶輸納則設三連納單一在州存照一人戶執照一里排比照不令里長有留單需索之患以俸餘置學田備諸生膏火試卷及賑給貧生之資行取入都四民泣送江滸言清白吏者必曰前馬後包

朱亮祖六安人洪武初與指揮使陸仲亨破元將邵宗愚於廣州以功封永嘉侯出鎮廣東勇悍善戰而不知學所爲多不法番禺知縣道同以聞亮祖誣奏同同死帝尋悟召之還鞭

死仍葬以侯禮御製墳誌

廖永忠巢人楚國公永安弟從永安迎太祖於巢湖年最少太祖曰汝亦欲富貴乎永忠曰獲事明主掃除寇亂垂名竹帛是所願耳太祖嘉焉洪武元年略定閩中拜征南將軍與朱亮祖由海道取廣東勅諭之曰王者之師順天應人所以除暴亂解倒懸慎弗殺掠肅清南服在此一舉永忠發書諭元左丞何真師至潮州奉表降不閱月廣州悉歸附市不易肆民不知擾蓋由永忠號令嚴明兵不敢暴故也廣人大悅為之立祠廣州平帝命太子帥百官迎勞於龍江

黃應甲萬厯中以總兵官鎮廣東龍川鮑時秀者妻杜氏有妖術據義州猴嶺自號無敵峒主既降復畔應甲討平之未幾梁本豪亂本豪故曾一本黨蟹尸也一本誅竄海中習水戰

通西洋結倭寇為助應甲與總督陳瑞分水軍二南駐老萬山備倭東駐虎門備蟹別以兩軍備外海大破之生禽本豪進應甲等秩有差

張元勳字世臣浙江太平人以總兵官鎮守廣東時惠州河源賊唐亞六廣州從化賊萬尚欽韶州英德賊張延光劫掠郡縣悉討平之又肇慶恩平十三村賊陳金鶯甘台村三巢賊羅紹清藤峒九逕十寨賊黃飛鶯等相煽為亂故事兩粵惟大征得叙功雕勦不叙故諸將不樂雕勦總督殷正茂與元勳計令雕勦得論功於是諸軍爭奮遂大破之威震嶺南與廣西李錫並稱良將

俞大猷字志輔晉江人舉嘉靖中武會試毛伯溫用為汀漳守備連破海賊擢廣東都司新興恩平峒賊譚元清等叛總督

歐陽必進以屬大猷大猷率數人詣賊峒曉以禍福賊駭服
有蘇青蛇者力格猛虎大猷給斬之賊益驚遂降其渠魁二
邑以安又招服瓊州五指山黎破海豐倭及河源翁源賊李
亞元等故事以勲臣總兩廣兵與總督同鎮梧州帝用給事
中歐陽一敬議兩廣各置大帥罷勲臣乃召恭順侯吳繼爵
還京以大猷代予平蠻將軍印而以劉顯鎮廣東兩廣並置
帥自大猷及顯始也後進右都督卒諡武襄

王清字一儷合肥人以武功累遷廣東指揮使總督廣東軍務
協同總兵駐軍高州廣賊黃蕭養攻廣州清帥舟師赴援至
沙角尾水淺舟膠失利被執賊素知清威望不敢害清投水
不死因寄衣還廣城中大書一詩云兩捧天書鎮百蠻偶因
兵敗不生還飄零身世輕於葉磊落襟懷重似山半夜愁吟

珠海寺幾回夢墮鬼門關憑君獨有衣相寄爲我招魂字出
間數日賊擁清至城下使諭眾開門清罵不絕口遂遇害朝
廷憫之加子爵清善律詩所著有建橐集行世

張傑雷州衛指揮同知視篆三十餘年勤慎自教喜翰墨有逸
趣

蔡玉和州人世舊功臣洪武中爲海南衛開展城池起創瓦屋
營房建演武亭存恤軍士惠愛及民

孫安字治平處州人任廣東衛指揮僉事洪武中奏展城池請
陞瓊州爲府

王琥海南尉揮僉正德初督脩清萬南三所令嚴約信每賊至
輒挺身出敵後征鷓鴣黎諸哨不前琥如期抵會所焚賊巢
而還掌衛印裁革軍士借辦月錢公勻軍糧及卒無以爲殮

官為給斂

程鑒字本虛合肥人卒業經史將鑑諸書智勇過人遷廣東都
指揮僉事與廣右沈希儀齊名而文學過焉一時名公巨儒
莫不與之往還者嘗登元覽臺雅歌有儒將風尋充左參將
分守肇高廉雷四郡建議立成岡松柏二巡司提督林富從
之卒年五十三著有雪崖集



